

兩浙輶軒續錄

兩浙輶軒續錄卷四十一目

顧成俊 許之敘 朱鳳階 蔣通 胡汝聯

李厚建 盧掌綸 孫廷璋 何鑒 施琢章

孫蘭谷 陶良駿 徐虔復 戴鹿谿 夏鸞翔

張鳳韶 張之杲 王汝金 錢松 查世澧

楊士鋤 金鴻佺 賈敦艮 周震 孔傳曾

方宗城 沈福謙 洪樹培 沈寶梁 陳政鑰

錢學煥 周惺然 余慶璠 王指南 端木百祿

蕭迺甲 孫祖珍 蔣士燮 朱嶧梧 史元善

許誦咸 朱嘉玉 楊逢南 張潮 章錦成

王信 徐燊 車暄 湯敬躋 姜文衡

江占梅 馬治準 田嘉修 蔣昌期 濮慶孫

慎毓林

周星譽

杜

聯

徐光第

裴嗣錦

汪文棧

張日照

裘元輔

蔣恭亮

張步雲

鄒在寬

楊國遴

王

泰

羅學源

許光清

許光治

曹錦堂

張

濤

王其瀾

謝澧蘭

陳

錦

朱善張

李

吟橋

楊

璵

徐

詰

陳文藻

張嘉鈺

嚴章福

沈文藻

許晉達

許旦復

倪梅生

陳

棨

陶慶禾

呂遵賢

車

林

周

永

茹贊元

鄭心水

錢

釗

朱劭英

胡鳳丹

樊貴賢

張豫翹

袁世緯

王國佩

余炳虎

葉楚材

翁秉榮

余

銑

柳應池

陳耀寰

兩浙輶軒續錄卷四十一

督學使者潘衍桐訂

顧成俊

字素雲號蕺庵錢塘人道光己酉舉人卹贈知府銜著棠花館詩草

杭郡詩三輯奏雲從黃輶泉先生游詩古文詞具有師法癸卯先以優行貢成均後殉辛酉之難

天台桃源行用王右丞桃源行韻

桃源別訪天台春偶因采藥來問津疑遇漢皋遺橘女初非
華嶽食松人厓內爲隈外爲隩不分攀援得平陸喜從溪水
見胡麻知有人家住深竹七寶光生金蹙釵六銖輕被銀泥
服白雲隔斷剡谿源瑤筍雲芝種滿園洞裏連枝花竝發溪
邊共命鳥同喧賀筵高啟羣姝集合把藍橋作湯邑秦臺鳴
鳳翼雙飛楚岫行雲夢初入壺中景好非人間勸郎住此何
須還芙蓉脂肉綠雲鬢畫樓臺青黛山春風半載歡相見
頓起鄉心返鄉縣閭里曾無父老留子孫已是曾元衍記得

分明邱壑真再來恂恂雲霞變惆悵溪流深復深桃花開徧
舊時林雙雙寶帳人猶昨明月蒼苔何處尋

許之敘

字煦齋號彝伯錢塘人道光己酉舉人官湖南石門知縣著芝香軒詩集

楊振鐸曰彝伯少馳文譽由孝廉試吏楚南頗著幹績
尊人品三先生光華登咸豐辛亥鄉榜在彝伯之後迨
就養於楚而彝伯中年萎謝其婦高茹字子柔奉
喪易兼子職爲校刊遺詩賢而多才臧黨稱之

題曝書亭著書硯

有序

硯係梅花坑天然石子旁有篆文竹垞著書硯五字
背有戴笠小像自製銘一首其上稍偏則他山老人
識也乾隆閒爲厲樊榭徵君所藏旋貽馬氏小玲瓏
山館主人道光閒曹種水明經得自邗江後歸黃霽
青太守咸豐元年八月方蓮卿司馬得之屬相寅甫
水部分箋都下徵詩

玉版太乙船奇彩耀青氈儒生皆有硯斯硯胡獨傳竹垞太
史歸田早閉戶著書寄幽抱一泓靈石端州來得之如獲連
城寶五十七言自譔銘不彫不琢追芳型背鐫小像敲笠影
與石同留太古形記者誰他山老人查初白跋者誰樊榭山
房好古客小玲瓏館不能有遷流又入曹唐手曹唐仙去誰
護持拱壁忽歸賢太守詩娛室扁悲故人寶彝齋啟滌羈塵
干將從今不出匣願君世世守奇珍吁嗟乎硯不磨人人自
磨誰云得力硯田多我今羈滯長安館惡歲頻逢奈若何

朱鳳階

字藹士號丹厓仁和人道光己酉舉人候選知縣箸丹厓吟稿

浙江忠義錄鳳階天資過人精醫卜又習天文句股之學咸豐十一年城陷罵賊被戕兩女隨母曹氏投井子慶長自縊以殉

暮春寄友

垂楊踈地綠絲絲已饒東皇酒一卮知否江南春恨在落花

時讀晚唐詩

蔣

通字省庵海甯人道光己酉舉人

家傳略通幼慧家貧力學性孝鄉里無閒言又好義親族急難解推不吝以力挑一尋授縣令官山東歷治劇邑實心愛民多惠政以病乞歸尋卒著有經學叢記河西舊聞課餘雜志等書均未刊某公檄先生攜銀往振察其災不能偏給請益某公辭以帑不足先生力爭語侵上某公怒先生仍指陳災狀卒如其請全活甚眾平度沙產金有孫姓者浙人也訴上官乞開採上官許之孫倚勢橫行蹂躪田廬民大恐將激變大府檄先生往孫以千金爲壽卻不受乃以無益於國有害於民申大府請永遠封禁箸爲令

千佛山

歷山舊是帝躬耕

千佛山卽歷山見通志

仙袂相傳誤得名

或謂千佛山仙袂之

詭

螺髻青收千嶂雨鵲華紅放九秋晴

是山與鵲華山相遠吳興趙王孫罷守齊

州歸作鵲華秋色圖登高香袂輕聯騎賞菊禪房醉舉觥重九日歷下
山登高賞菊一時歡擊肩摩途爲之塞直上前峯回首處萬家煙樹護重城士女悉於是

大明湖

月明橋畔動秋思

湖上有鵲華橋明湖秋月系濟南勝景之一

且載笙歌任我之

幾箇亭臺臨水近萬行楊柳傍隄垂
因路曲隨篷轉船爲

花多蕩槩遲

湖中有方舟數尾夏秋白蓮花最盛有四面荷花三面柳句

綽約情人無限

好歸來同拜鐵公祠

趵突泉

雙清亭外古今由

亭在泉傍卽呂祖殿下

三穴騰空勢不休風勁亂拋

波底月濤翻似挾海中漚倒傾全峽高難激直涌寒潭瀉復

流倚徧石闌人意靜一聲霜鶴更鳴秋

泉傍有一鶴

胡汝聯

字蘇亭德清人道光己酉舉人保舉知縣

兩浙輶軒續錄

卷四十一

胡汝聯

李厚建

感懷

轉徙他鄉動隔年
越中鼙鼓又掀天
登樓有客悲王粲
蹈海無人效魯連
家室幾時歸雁戶
東南何日靖狼煙
故園回首成榛莽
極目關山涕淚漣

李厚建

字勤甫鄞人道光己酉舉人

浙江忠義錄咸豐三年甯波戒嚴厚建率鄉人舉團練偵知賊結土匪密期舉事以計縛其首獻於官入年三衛告警厚建以勦賊自任六月賊緣江岸大至厚建率團勇鏖戰賊乃退七日進勦至覺濟寺賊眾四集力戰死之

予雲騎尉世職

遺懷

涼風颯颯雨霏霏
時見階前落葉飛
孤雁一聲秋意遠
寒花幾點故人稀
身無健翮恆防繳
家有遺編任掩扉
喜我夜來常自問
頻年蹤迹未全非

晚眺

日夕萬機息曠觀心倍閒斷霞低襯樹暮氣遠連山鳥背村
煙去人攜市酒還幽情渺無際獨自倚松關

盧掌綸

字世美號稚仙鄞人道光己酉舉人官餘杭教諭箸寄雲草堂詩鈔

游報國寺

扁舟一櫂白雲鄉邃宇新開選佛場松蓋參天山鶻健蓮臺
拔地野狐藏頽垣鈴語拋春雨殘竈茶煙裊夕陽孤寂不嫌
游興熟歸來初月正昏黃

孫廷璋

字蓮士會稽人道光己酉舉人候選知府箸勉憲堂詩集

潘祖蔭序略蓮士天才藻麗超絕時輩詩文組織務極葩豔尤工填詞屬悉伯審擇付梓愴然識之李慈銘傳略君素無鄉里名見俗士輒瞠不言或示君以所作則笑而仰視屋椽故為謬語以故益無知君者比入京師名乃大起歸而與予交益治經史務為本原之學閒與君為詩詞君務鏤鏤隱僻干鍛百鍊必於奇

麗蓋其天性也積瘁早衰卒年僅四十有二簪亢巍堂文集玉井詞

松濤

天風北來不到地噴薄蒼龍作秋意直疑倒海洗碧雲中有
江斐恣游戲是時密翠屯晝陰肅然萬景天爲沈須臾荇藻
亂空際可以橫卷湘江潯或當跂腳臥夜館風水霓裳夢久
斷忽漫寒漪醒毛髮此身未覺江海遠我欲因之訪成連一
氣湊泊三山前舉頭風定涼月墮依舊石上胎禽眠古來幾
人真解此山中宏景亦老死卻誰翻入瑤琴端笑殺北窗高
臥士

江行遇雨迷不得道泊荒港中

空灘響交蘆遙天墮平楚津亭不辨色孤纜鎖江雨勁寒肅
精魂頑黑警遙語颯然枯炬燼山鬼相爾汝真宰變廖廓萬

象入慘沮平生睡夢事
直用堅忍取息倪還吾
眞雲霽天亦曙開門見
白鷗昨夜宿何許

題畫

大好鄉光入畫圖
水花風葉鏡湖居
滿庭桐桂茶初熟
自課兒童讀道書

長安秋興寄伯兄

一枕西風夢不成
鄉心橫似亂雲生
天涯總爲傷貧賤
陷路誰堪託死生
小院夜闌聞落葉
破窗涼緊逼長檠
自憐作客曾非慣
淒絕中宵絡緯聲

出都後道中述懷

風雪關河一敝裘
吾生今日信行休
嘯鷗淡月商量夢
瘖馬酸風整頓愁
老去祇應看射虎
年來多已媿盟鷗
蚤知搖落

今如此悔別青山事遠遊

擬陶徵君田居同叔雲萼客素人季貺作

暄風暖平疇嘉穎萋已繹負耒及茲辰生事良可勛翳翳榆
柳閒植杖紛遠矚頽景倏造晚墟煙眷歸犢人生各有營政
爾求所欲相期歲功茂春醪亦旣熟偃息撫塵勞黃農此焉
足

雨中出城訪萼客則出游南湖諸寺矣次日柬寄

春陰匝地雨騎月新漲拍天城枕湖有時輕齋就弱艇想見
練帶懸薇壺茶煙寺寺水楊柳邨瀑崦崦山鷓鴣題詩到處
窮屐齒吁嗟謝公今豈無

雲棲禪院留題

丈室天花倚翠屏定中一磬落秋冥鬢絲舊感都除起聽調

蓮華小品經

從軍五河道經邗上食蟹有作

黃巾十載滿天地江淮殺人血如洗城頭日落胡笳酸旋風
如刀鬼爲厲扁舟馱夜邗江濱湖西賊退無兼旬空涇蘆花
泣燐火斷陂菰米沈寒雲江鄉蕭條那可說馱有霜螯賤如
昔老漁性命賊口餘夜捕西風去餐客書生身手劇可憐豈
能殺賊先諸賢江頭十日風雨惡孤征仗劍心茫然左斫雙
螯右持酒臥看秋星大如斗封侯萬里行焉求一飽其餘復
何有將軍今夜鏖敵圍擊鮮醺酒歡如雷荒江無人霜月白
我與諸君遙舉杯

珊士招飲酒樓歸誦君詩卽題其集用卷中往年倒和

鄙人食蟹詩韻

爲君一飲三百杯枯腸茁角收飢雷歸來讀詩破醉膽偏師
敢奪長城圍陳登豪氣無不有烏帽狂歌拍銅斗騎驢花市
散直回狼藉使才如使酒海內兵氣方囂然落拓難爲王公
賢一官將母苦不足飢死羞乞侏儒憐我復懷君同舍客駿
骨仍聞瘦如昔漢廷揚雄強解嘲謂周叔雲太史星譽秦邸蘇君徒獻
策謂李蕤客郎中時猶未到況我飄泊同孤雲百指旅飢常
兼旬與君今日尙握手明日拋骨空江濱還君詩卷益淒厲
請君詩腸倒江洗麒麟高冢今特多政恐埋詩少餘地

滬上遇王小鐵舍人塾贈之以詩并索畫家山圖兼示

令弟研香孝廉

我初識君司寇宅

謂趙蓉舫師

三十有餘頗白暫問名知是詩人

孫文采風流故無敵

君爲夢樓太守曾孫

是時海內初用兵潢池盜弄

何足平吾曹但築詩酒壘縱橫各有長安名嗚呼世運日遷
變錦片東南今百戰傷心吳越等無家飄零海角重相見相
見華顛各已皤一時遽欲問誰何纔隔十年渾隔世河山且
異況其他跡昔乾嘉稱極治文苑儒林不勝紀翰林太守擅
宗風詩埒右丞書內史百年雅道付文孫寄食南昌不自存
狀貌空遺蕭穎士丹青堪歎曹將軍須識兵戈苦相戾造化
總還輸筆力倔強能逃浩劫中嗟爾江山猶脆質我今屢見
煙江圖洪濤萬木爭號呼天池倒傾元氣溼眞宰入握羣靈
趨又從王珉白團扇瞥見驪龍珠一串知是君詩脫贈新入
神篇翰何蕭遠如此才名作寓公聲價頗然來向東海濱末
伎正喧雜得此吾道非終窮愛弟詩篇最沖俊結社西園互
標勝顧廚俊及一時豪難得鄴中聯二應我如靈運本疏頑

白社無因得叩關苦惜屐材無蠟處須君爲我畫家山

元道山有

圖家山

旅夜閱唐秀才端州紀變詩書感

慘澹西風激素波悲如同谷七章歌目空程李餘何算氣挾
幽并老不磨尙憶麻鞋餘慟哭如今銅狄賸摩挲鐙前擊節
生振觸我比唐衢淚更多

題陸秋生廣文邗江詩夢圖冊子

蛤蜊菰葉晚蕭蕭月落隋家第幾橋虧是秋墳能唱句不然
涼夢忒無聊

吟過棠梨月色斜纖烏吹送客還家恩恩詩尾忘題款或是
當年蔡少霞

何

鑒

字安亭蕭山人道光己酉
舉人簪問梅小閣詩草

和志春圃夜雨有感原韻

空階聽夜雨五月落梅時風怒來偏急雲癡去故遲情懷千點亂心事一鐙知安得林宗趣逍遙巾角敲

施琢章

一名茂椿字北林金華人道光己酉舉人官戶部主事

胡鳳丹曰北林農部學問淵博著述宏富惜燬於兵燹授輯以見一斑

題胡月樵武部桃谿垂釣圖

桃溪水合華溪流桃谿之景清且幽塵容俗狀不到處昔人于此營菟裘陂塘轂轉水泉冽溝塍櫛比桑麻稠新篁叢叢圍綠玉古松鬱鬱蟠蒼虬溪邊種桃千萬樹傾城妹麗紛盈眸胡君家住桃溪頭桃花流水觀魚游竹竿笊簪家具足輕舠一葉東西浮竭來捧檄羈京國萼鱸忽起西風愁繪成綠蓑青笠態頭銜仍署雲溪侯我聞鵬鵬有遠謀低飛恥學枋

榆鳩矧君才大無不可隻手能挽千鈞舟萬里會看破浪去
一帆詎便當風收待掣鯨魚過碧海翩然返棹隨鳬鷗武陵
桃花遲君至他年此願終須酬我家坦溪已十秋早與猿鶴
盟林邱從宦自憐潘岳拙無才合效司空休掉頭欲把釣竿
去恨無六逸爲朋儔需君宦成遂初服期君開徑招羊求預
乞一言盟息壤茅庵好爲東坡留

孫蘭谷

號秋溪平湖人道光己酉
順天舉人官戶部主事

家傳略君官農曹三十年廉慎自矢晚歲
告歸主講當湖書院光緒庚寅重游泮水

平湖學派四先生詠仿薛文清河汾五賢詠體

張熙河先生

誠

岱宗與峩眉山炫心目遊徧幾兩屐歸來隱茅屋疊石於
其中嬰山好卜築古籍有時披奇書無不讀景仰三魚堂勵

志在慎獨凌霄節超邁伏案神靜穆嘯軒乃其友詩筒屢往
復高人饒清興梅花滿林麓

蔣大始先生元

力學惟程朱詆毀被嚴斥手錄千萬語先儒恍親炙道德以
爲藩仁義以爲宅人範垂後世何敢踰寸尺載道輯一編豈
爲功利役修途戒旁鶩學術慎抉擇終身厯坎壈嗜古有奇
癖千載叢桂堂清風緬几席

方子春先生垌

正學窺奧窔中年尤專壹毅然爲己任精修在爾室巷多間
宇車右軍此其一譚曉蓮方伯貧居負南郭晨夕勤著述生齋數
萬言妙緒尋卷帙冷官播教化聲華庠序溢時雨均陶甄秋
風忘蕭瑟繼起復有人岐嶷功邃密

顧訪溪先生 廣譽

巖巖瞻道貌撫躬克自立義理窮鑽研經史常出入蓬蒿掩
門戶脩綆古是汲躬行期實踐升堂厯階級潛心務誠正塵
念豈交集說詩客解頤從學人負笈浮名謝薦舉高尙不可
及講席開龍門場藿賦維縈

陶良駿

字筠笙會稽人慶仍弟道光己酉順天舉人官山西太原知府

家傳略公由揀選知縣厯任榆次沁水臨晉諸縣勤政愛民料事屢中軍功擢知府以轉餉勞保升道員加按察使銜生平詩不多作酷好音學箸有音紐中西音韻異同通義

葉家山

四時不斷筍六月竟如秋最愛雨初霽山光青滿樓

初秋

西風昨夜透窗紗漏鼓沈沈碧漢斜枕簟微涼新睡足半闌

紅日射干花

徐虔復

原名鼎梅字寶彝通惠子上虞人

諱獻撰墓誌君生絕慧讀書博習銳欲試于事雄于文辭其志卓然不阿舉乙科終已不達意氣自若也賊將至君抱其詩文橐草走姜渡遂及于難賊擲君行所議王某先在君曰汝從賊耶吾有死耳王咋舌不能語賊渠知君文士屬王款之謹伺之君憤不食俄而大飲嘆罵賊求死數日誠意漸弛一夕臥起得賊佩刀倚柱袒而觸之且觸且呼王曰徐虔復死也王驚起視則君已浴血僵矣

雲館集

孫德祖曰丈太翁鹿園先生與于先王父尚齒會丈及先叔父新城公為忘年交其後與先從兄念祖成同歲生過從尤數余州角時及見之博學能劇談一揖入座滔滔清辯如倒三峽水其英采溢于眉目年甫四十死

寇難士林惋惜之文初爲賊所得謾罵求死賊愛其才
羈縻之卒勿忍加害欲自殺患力弱不能自殊憶戰國
策武安君銜劍徵柱自
刺事效之乃得死烈已

讀王笠舫先生綠雪堂集

舞罷霓裳惹憾長詞人終古落蠻荒半生傲骨撐天地一代
才華壓宋唐桂嶺雲扶詩筆健珠江風賸酒旂香青藤已去
公應替惆悵當年綠雪堂

佯狂直到夜郎來庾信江關事可哀

先生流寓兩粵十餘年

山鬼蘿衣

曉夜月蠻天銅鼓走春雷人才宜向花田老詩境多從瘴地

開末路英雄醇酒誤中山何事醉千回

先生疾時貽汪孟榮書云曹子建才誇八

斗今笠舫飲酒嘔血亦如其數

謝文節公號鐘琴歌

六陵碧血埋金盃金牛王氣沈簫管江南留此七條絃千秋

重譜興亡感聞道此琴出燕城土花斑駁苔花明上絃彈出
五國城中大漠冰霜曲下絃彈出潮陽港口厓山金鼓聲青
猿一嘯山鬼哭巖石欲裂蒼天驚哀哉文節琴卽是文節心
鴛鴦曲奏金戈動蟋蟀聲催鐵騎侵儘有波濤沈少帝徒勞
風雨泣孤臣景炎時事可知矣抱琴直走建陽市劫換紅羊
赤縣沈謠成白雁秋風起建江燕土屢奔馳馬角烏頭抱恨
歸魔舞有靈歌毳帳黃龍無酒灑青衣零丁洋五坡嶺南朝
宮闕悲秋蚓清商一曲龍吟長冬青幾樹珠襦冷遺琴耿耿
寫孤忠迴瀾無力障江東譜留故國寒煙白曲奏荒陵夜燒
紅吁嗟乎擊賊笏渡江楫茲琴直欲爭芳烈至今海陵山下
怒濤鳴猶與松風堂上琴聲共鳴咽

松風草堂吳
素江藏琴處

六陵懷古

金牛王氣黯江東半壁山河夕照中瘴霧蠻雲羶帳曲白楊
青草絳霞宮北歸煙雨龍城暗南渡鶯花鶯羽紅麥飯棠梨
寒食節千年石馬哭西風

述懷投孫子九

君是東坡我少游雲霞交契並風流才華有用傳青史文字
無靈困黑頭殘月鶯花清夜夢空山風雨草堂秋挑燈偶把
離騷讀落葉如潮惹客愁

杜貞女行做忠雅堂體

貞女山陰杜比部稼軒女幼字同邑張孝廉魯峯子以均未嫁

而以均心稼軒欲循常例改字女勵指自誓卒歸張氏

東海濤白如雪女貞木堅如鐵罡風吹天柱折靈爲愁鬼爲
泣貞女操淩霄節未同衾願同穴簷蔔花蟾蜍魄女對茲其
芳潔母家杜比部女婦家張京兆府夫以均象筭舞甫成童

疾攖蠱朔風淒鵠鵠嗁明月暗愁雲低隔紅牆現素蛻夫已
亾呼蒼蒼身未嫁神暗傷婦從一守綱常新淚痕霑羅裙屏
織縞拂綦巾棘中刺刺女心蓮子苦苦女身鵲淚涇涇女襟
精金鍊鍊女魂白楊樹三尺墳靈有知何欣欣父告女無徒
苦別議婚結鴛侶女來前兒志堅死靡他昔有言呼天只悲
憤起明兒心自今始血淚零雪衣紫拔金刀斷玉指一寸鐵
霜華洗一掌血桃花水茶檠苦甘如薺父不信兒自矢父悲
涕息婚議素車迎成女志陳籩豆主中饋進筭筐舅姑慰婦
讀書明大義兒存亾無異請於

朝綽楔標告諸鄉閭里光鑑水濱清風生稽山石貞烈銘我
作詩汗簡馨冬青樹長青青

贈某副戎

志切從戎未荷戈英雄髀肉歎消磨虎頭事業驚人少馬革
功名弔古多玉壘陣雲愁隼鶚錦江兵氣走鼃鼉請纓若遂
書生願未肯吞舟漏尉佗

書湯卿謀湘中草後

一聲鶴唳大江東葉落長洲兩岸楓萬里煙雲封紫塞十年
花月哭吳宮愁沈滄海秋濤碎淚灑君山兩點紅賸有西堂
遺老在招魂空向楚天中

荒荒齋裏長蒿萊無復吟詩問字來六代鶯花山載酒千秋
人物鬼憎才月寒湘水三更碧風卷青燐萬壑哀如此奇才
如此福問天搔首費疑猜

夢斷南樓泣夜烏墨花噴罷淚痕枯草荒白帝埋鸚鵡春盡
江南怨鷓鴣斗室香留名士韻畫簾煙鎖美人圖天邊自有

鴛鴦冢不數昌山石望夫

卿謀後其婦亦一勤而絕

讀罷芸編汗簡馨眼光如劍發新硯空山雨洗秋猿淚香草
魂招帝子靈冰簟涼侵詩骨瘦竹樓風卷夕陽青詞囊我亦
師長吉未許蠶眉鬪尹邢

題周叔雲

星譽

倚竹生吟草

金鞭夜擊靈鼉鼓霹靂一聲海蛟舞鱗爪蟠空神采飛化成
青管鬪風雨周生健筆凌雲煙沐日浴月搖青天滿紙淋漓
怪燄發文光夜射星斗寒我讀君詩雙眸豁金鑊一刮開攀
瞎生龍活虎不可擒生平豪氣爲君壓迅若空山走奔雷太
華峰矗雲爲開勁若馮夷吹水立江潭日落魚龍泣麗若芙
蓉明朝霞玉簫吹落天女花奧若古鏡出黃土蛟紋淚漬銅
人乳陰燐燐火欲奪不敢奪丁神甲將欲取不能取坐使泣

鬼驚神一枝筆騷壇生面開千古誦君詩與君語仗劍少年
遊磊落多奇遇蘭成哀怨杜陵愁詩人例得江山助胥口寒
潮飛白雲姑蘇臺畔煙草春雷門鼓擊金虎沈烏樓曲奏吳
山青君乃從茲開胸襟黃河濁浪喧天黑太行嵐氣雲如墨
雁驚碣石秋風急馬渡淖沱夕照赤君乃從茲鍊詩魄燕趙
古多慷慨士俠客衣冠來易水督亢圖成七首寒穀城雲暗
英雄死君乃對茲壯懷起年年花看長安道銅柱天高玉門
小花市鐙懸萬戶春九天搖動星河曉君乃對茲斫地激昂
抒才藻君所師柯亭子君兄文之有柯亭子稿君所居鳴珂里丹成九
轉換凡骨金鍊精神玉鍊髓山川勝概無時無窗下埋頭豈
丈夫君家昆友補天手事業文章俱不朽雕鑄造化佐元功
松花十色珠璣走我生尙苦滯塵緣未載米家書畫船君詩

一讀一擊拊梅花香雪侵肺腑異境別開詩世界興酣撒手
滄溟外歌成劃然發長嘯青山向我低頭拜

續髮後追悼亡婦

春風如翦雨如塵每遇歡場倍愴神薄命已成前世恨傷心
難語後來人天憎情重偏開劫詩到愁深轉未真偶憶唬猿
腸斷處燕山雲樹黯關津

趙松雪畫馬圖爲端木小鶴題

真龍入海天魔舞龍種淒涼泣風雨靖康泥馬已成塵畫圖
猶寫龍文譜吳興本是天潢支當日畫馬稱神奇胸中先作
千里想下筆如聞秋夜嘶一字坡前數十匹綠驃紫眼神駿
姿髣髴天馬來西極騰煙欲上不受羈奔者朔漠驚沙飛立
者萬里浮雲齊齧者苜蓿西風肥飲者長江銀濤低臥者拳

曲連錢影舞者蹴踏桃花蹏一爲大地洗凡馬筆墨到處生
天機王孫絕技擅名譽紫燕鵲黃在指顧可惜長城報主身
不隨飛將營中去當年王氣黯金牛鼙鼓錢塘鐵騎秋玉馬
珊鞭沈碧海錦韉金勒擁旃裘伏櫪雄姿爭俯首岳家良馬
今何有朝卸天閑白玉鞍夜馱毳帳葡萄酒龍鬚鳳臆人誰
識繪圖應減驂駟色臥聽厓山金鼓聲馬若有知當飲泣君
不見徽宗封馬龍驤軍當時畫者豈無人鐵衣驚破洛陽道
長鳴振鬣走邊塵馬本方物那足數至元校射麒麟圖願乞
丹青魏武孫爲君一繪冬青樹

(周文之刺史

沐潤

自新疆

恩釋回里賦贈

九邊風雨逼雕寒知是羈人淚未乾塵世才華遭謗易孤臣

心事告天難榮枯吾道千秋在流放

君恩萬里寬只有素琴愁再鼓銀徽淒咽不堪彈

時君丁外難又抱騎

省之感

自臨平至姑蘇紀程十絕 錄四

數峯遙壓虎林關丹嶂明波罨畫閒一片江光幾重樹天教

收盡浙西山

浙山盡於臨平

下水帆開浪拍天長安村屋抱江圓團沙破網牽魚客野火

籠鐙販米船

江村城郭晚煙含新綠簾櫳水抱藍街鼓初嚴鐙火靜玉簫

聲裏夢江南

是夜泊石門聞鄰舫簫聲

官橋春暝晚風柔夾岸笙歌出畫樓一片南朝花月地綠楊

陰裏到蘇州

送叔雲庶常入都

聞道防邊羽檄馳干戈未定竟何之

時值兩湖用兵

大江落日征夫

糧萬馬秋原上將旗風雨不磨知己淚河山猶戀太平時離

筵重說崎嶇事滿目烽煙繫我思

浪迹天涯又幾春

君近歲寄寓吳皖

梁園風景已如塵中年哀樂多

歧路老手文章少替人舉世難容龍性傲論交應數狗屠真

金臺若遇江鄉客爲報徐陵尙耐貧

小鶴以姊氏少坤女史畫菊屬題因成二絕

錄一

古香遺墨纔吟罷

女史有古香室遺集

又對寒英誦楚騷莫道三秋花

信惡本來風格太孤高

女史未笄而卒

銅鑪感舊圖爲陳子餘參軍作

有序

君金陵人妻張結褵時以一銅鑪雜奩具中高廣尺

餘制頗古癸丑春賊陷金陵妻與母俱殉節家資蕩
然後數載君得是鑑於姑蘇市上遂購歸繪圖題曰
銅鑑感舊

涼雲浸水銀釭藍碧篆嫋嫋愁煙含寶鏡無光明月缺斷腸
心事哀江南江南有客增嗚咽哭罷家山悲錦瑟行囊賸有
博山鑪道是深閨舊時物鑪形瓊侔類懸匏口窪腹凸身類
頤紀顛窵豆足髣髴古翠駁落蝸涎交當日鹿車備資送壓
帳護衣隨侍從錦幄香吟豆蔻詩玉臺佳識芝芙夢渠几湘
簾拜月時香蟾密誓有郎知願聯比翼黃金鵲願結連心碧
玉獅比翼連心纔惜別灘江忽起黃巾賊義行樊妻指碎箏
禮宗皇甫頭懸輓仙人樓上錦成灰織女橋邊烏泣血轉櫛
藤緘朝露空虞棺柝掩秋蟲蝕

君母與妻殉節後賊大至卽於後園埋之此時蟻

賊滿金陵故里蕭條蘭蕙焚絳樹草埋銅雀硯綠翹泥沈鬱
金裙文翁書屋風吹絮弄玉妝樓鏡掩雲蒼黃夫壻長飄泊
無復家園亂後存茲鑪棄置誰珍玩清供長辭玉臺畔麝火
埋朱釀劫灰蘭煙歿馥淪塗炭別鵲離鸞動客愁鏡烏偏戀
舊妝樓少府春江金盃出茂陵秋雨玉杯收一朝偶過姑胥
市故物重逢雜悲喜綺篆煙迷淚點留金精血染苔花紫官
燭西堂添麝炷茲鑪尙有相逢處昔日紅樓心字香今朝碧
海相思樹莞蕩桃笙枕簟涼藍橋風露殢愁腸燕絲蝶夢芳
魂杳鈿合釵梁別恨長繪圖不用黃金寫一段因緣寄香火
紫玉煙招異世魂青萍血證它生果狼藉東風野草愁秣陵
喪亂幾春秋爲君誦罷黃門賦江水吞聲日夜流

戴鹿谿

字勺齋蘭溪人道光己酉副貢陣亡
卹贈布政司都事銜襲雲騎尉

縣志鹿谿素果敢咸豐辛酉五月賊由壽昌竄入西鄉
鹿谿與族眾誓守村隅置家屬於柱竿廟會從弟鹿星
先帶團勇協守長嶺至是亦退歸相助賊來攻數敗走
比十六日賊襲至腹背受敵眾驚潰鹿谿鹿星皆陣亡
賊縱火焚柱竿廟老少男女死者無算鹿星
以候選縣丞贈鑾儀衛經歷並世襲雲騎尉

題雲霞寺壁

世路有夷險時危還讀書山花自開謝紅白不關渠

夏鸞翔

字紫笙錢塘廩貢官光祿寺署正著春暉山房詩集嶺南集

復堂日記紫笙遺詩春暉草堂集少作差弱丙辰北行
後筋力于高岑出都避地憂生念亂成就於浣花已而
流寓嶺南吐音高亮寄興遙深五言如公子
五花馬佳人雙鳳笙宮商絳會一洗哇鄭
陸有王曰紫笙工詩精繪事篆刻學極博凡天文句股
音韻卜筮等書皆得其奧嘗遊頂梅侶先生門故於曉
人術尤精避地嶺南應同文館教習之聘旋卒所著少
廣繼鑿洞方術圖解致曲術致曲圖解粵人爲附刊鄉
徵君伯奇遺書
八種後行世

留別張誠齋興厚

束髮好翰墨與君親倡酬三年下帷居文史窮冥搜君爲祿
養計遠客天西頭捧檄返吳會偪側解谿流今我忽不樂迢
迢訪薊州閒道遇知己扁舟訴煩憂頻年厭離樽孤雲罕羣
遊眷懷罄所積長會無因由揚州故都會冠蓋盈道周一自
動妖星旌旆紅數秋駭禽未入網無乃疆吏羞況復風俗敝
宴安忘戈矛吳姬青翰舫吳兒青羔裘一飲動十萬梁肉如
山邱知君憤所切扶顛資運籌嗟予江海人天涯行未休岸
舟艤待發誰能久淹留荒草姑蘇臺子規空叫愁歸來期爛
漫天末心悠悠努力各自愛稻粱宜慎謀

四君詠

仁和毛西堂茂才

庚

城東風日佳睇髮足清娛高人張野花流寓雲谿漁神靈之

窟宅蔚爲風雅區毛生頗挺出矯矯名家駒黃髯而深目行
步安以舒善鑒古碑帖能作盈尺書餘事及刻畫篆籀希古
初圍棋更精絕敵手通國無平生所護惜印譜半尺餘道岸
峻無對見利曾不趨求觀好字畫乃至晨夕俱萬物聚所好
古人豈欺吾我從丁巳春別君城北隅貽書糾我繆遊子計
何疎遊子念故人故人歸黃壚白刃洵可蹈惜哉千金軀

錢塘項劍霞茂才 錦標

余幼耽苦思束髮好奇技窒礙求其通寢食細事耳道光乙
巳夏從學項夫子周髀參微茫微率剖神髓日月麗高弧渾
儀可掌指劍霞秉家術實事務求是致知在格物持論頗條
理愛畫思入神胸有好山水樓閣圖阿房軒楹疊層累更作
攝光鏡鏡端藉以紙紙上見圖畫千里在尺咫我

朝二百年瑰才那有此嗟嗟生不辰中年以難死君嗣度海
來見我涕不止滄海有時平故人長已矣葛帔冷西冷自顧
顙有此

歸安張南坪茂才

福禱

吾浙有張生家在弁山麓曳屐蹠行垢膩面不沐衣冠樸
無華可積塵半斛憶我遊吳門傾蓋論心曲數語驚天才辨
難恣往復奇器探天根測算洞三角水經道元注神術管生
卜秋老蟹初肥相期慰幽獨頻年走彭衙相逢在滬濱江樓
爲淪茗離情寄紅燭信宿航海行相思若轉轂去年得鄉訊
知君猝不祿懷中達官書馳歸看骨肉賊來搜得書柴燔頂
至躅造物忌才能相報抑何酷哀吟不成聲鵲鷓啄華屋

青浦周荔軒茂才

南

造物忌才能吾爲張君哀哀張未一月周君凶耗來昔余寓
澧浦久病未斷瘵求醫而得君復尤用不乖病起叩所學拊
几嗟天才千言可倚馬百氏能兼該漢唐洎兩宋取之如在
懷前年走鐵沙瀕海詞場開南湖拜上將餘子何有哉江村
鱸鰕肥蠶豆晚更佳沈侯韻初張公子雲來相勸飲一杯別來僅
百日亭館爲塵埃杜陵粹陷賊辛苦歸麻鞋出險遂篤疾玉
樹痛長埋野寺紅闌干謂川沙施相公廟秋水淨若揩茲遊那可得
坐令心肝摧

爲雲來鐫小印歌

張子手持寸石印索我作篆施鑿椎秦漢銅印以范鑄成文者爲多亦有椎鑿成文
字體荒率軍中用之篆必瘦硬方通神自愧瞻恆腕力疲金鍼想像走
蛇蚓玉箸髣髴蟠龍螭心之所到力不赴何用意匠經營爲

曰若蒼帝造書契祖龍一火無子遺嶧碑殘篆二十九秦廷

獨數丞相斯叔重辨文隸以部後學始得窺樊籬秦權湮沒

漢瓦碎天發神識尤可疑天發神識文五字碑相傳孫吳所作然字體鄙俗余常疑之今

人作印尙法古形摹篆籀神則離于秦曰鈐漢曰印秦人私印多作

某某鈐按鈐字不見古書爵邑名字分官私穿絲作佩妙製

未詳音訓漢時乃作印字爵邑名字分官私穿絲作佩妙製

紐秦漢銅印皆佩印也蔡倫以前無紙無所用鈐流辟邪覆

斗瓦與龜辟邪獸名似獅古印魯公一印寶片穀唐印流傳

公玉印鑄真卿太原公主疇能知余家舊藏銅印文曰太原

誰何惟五代史石敬瑭尙明宗公主廢帝妹也敬瑭初封太

原其卽此與第新唐書公主列傳皆用己封地此從其夫者

何與存疑宋元篆刻尙圓勁宋元小印多尙圓有明備法多

以俟知者良師三橋規矩雪漁趣長蘅絕藝由天資明文三橋彭何雪

也李長蘅流芳戲我生橐筆歎濩落文章未勒淮西碑揆藻

爲之遂與方駕

天庭復何日更無沙石相磨治區區一印亦纖瓌留銘敢比
鐘鼎彝家鄉度閭富金石烽煙慘淡心骨悲先君收藏商周鼎器甚夥杭州
庚申之變無復盡餘歐陽集古縱成錄槌拓不得留隄余家舊有拓
友人借觀史歲已死六書佚誰與商訂竹統辭還君此印重
遂燬于火相望周顗繫肘當有時

與雲來論印歌用前韻

混沌開竅孰剗刃五丁闢路爭運椎古印傳後啟涂徑網蒐
秦漢心神疲朱文勅自武安君武安君三字銅印少卿二字

蟠雙螭

嘗見漢銅印朱文少卿二字傍作雙螭繞之

延年益壽更樸古羸秦以下

安能爲

嘗見古銅印朱文八字曰延年益壽與天無極篆法錯綜入妙海鹽陳氏印譜斷爲秦印不誣也元

瑋花乳石印昉鐫牙已有兩漢遺

禾中友人寄示舊牙章白文王仁之印渾穆精湛古

色黝然論者謂是漢印沿制度也俟考

佩繫纍纍香寶氣惜哉明眼無波斯千

秋梁氏任沿革

明人篆刻習氣甚深至變明派丁鈍翁略師之遂開

本朝梁千秋乃稍本朝諸家余

徑

古人恨未窺其籀漢印流傳有臣某草野顰效吾竊疑有

臣姓故常有臣某某印今以爲君臣之臣仿而爲之陋矣

丁先黃後一鑪冶

本朝丁鈍翁尚精到奇古

黃小松步武之極有神似處

奚正蔣奇雙美離

奚鐵生恆守規矩蔣山堂尚奇恣超乎規矩之外矣

二陳挺出近時彥豈以浙派爲阿私

陳曼生以渾灝見長陳秋堂以理法爲主皆正

也宗朱泥臚列某某印姓名待問五總龜鐫款賴有拓本在人

地時代麤可知規秦模漢復何必轉益多師爲我師吾友毛

遂堂與戴聖伯

用示我俾作摩揣資裝冊題某所作如銘署

器額篆碑磷彬光彩燭天起篆刻六病爲醫治方今天下書

同文海東赫赫存

王彝文心雕龍道傍負鏤心鉢骨銜闕悲殘碑斷碣委榛莽

江鷗狎殿臺走麋遇亂誰能鬢不變何暇口沫滂喜辭楊雄

奇字問者少金石刻畫非其時

穠華館題壁和羅秋士丈

文鑑

穠華尙如昔又是客來時
楹淺經風早牆高度竹遲
露光眠鶴警秋信亂蛩知
不盡古今感桂花仍滿枝

夕陽紅半樓訪蔣藹卿茂才

坦不值

雲外一聲笛高樓起暮煙
夕陽移遠樹飛雁落長天
予亦寡所合此行殊悵然
明當發高詠兀兀共忘年

東光道中

使君持節出朝端
錦纜牙樯夾路看
吳楚一軍需
挽粟燕雲萬戶待
朝餐三年浮海風
雲變四野徂飢報
稱難莫盼江南
歌舞地黃河回首是長安

海

到此方爲水華夷一氣藏只堪天在上直與地無疆玉貌平
原客虬髯異姓王英雄渺何許風急雨茫茫

連州江中一路看山作

昔聞桂林山奇險甲天下其次連州江蒼秀世亦寡長風蕭
蕭從南來吹我蒲帆疾如瀉一山若嚙齧一山若塗赭一山
若仰盂一山若覆瓦蘿衣山鬼騎翠虬螺髻天人捧玉舁山
花豔豔魔女鬟鍾乳巖巖虎背哆熊羆夾岸暝欲顛鷓鴣雀盤
空避不惹十里五里逢平原罅隙稍稍露蘭若懸崖絕壁多
團焦云是當年避兵者吁嗟乎東高塘西大廈劫後行人淚
盈把獨有山前久戍兵銀鞍翠裏花驄馬

張鳳韶

字研侯炳矣子錢塘人
箸峨眉山莊吟稿

高偉曾曰研侯先生秉性純厚談於榮利從侍宦遊涉
歷十四省流覽山川人物博綜書史故其所爲文辭蒼

古樸茂然脫稟輒散棄篋中鈔有存者書法二王人爭
藏弄晚歲偃蹇尤甚義命自安與世無競戚鄰咸譽之
匏庵在滿覺院舊址之旁吳名益所居

蒼翠深林舊結茅小庵初築等懸匏風塵回首羣機息

陳洪綬爲

書杜句云側身天地更懷古回首風塵甘息機水竹當門一徑交胡蝶夢中人自幻
中有榻木犀香外句閒敲

手植桂樹根倚巖石輪囷數圍爲翁山老桂之冠

竭來扶

策尋遺冢煙挂藤蘿月挂梢

一片雲石在風篁嶺上石高丈許青潤玲瓏

鳥下風篁轉嶺隈陡驚片石擘雲來一竿剩自媧皇鍊萬變
奇於鬼斧開雷雨神功分太華有無山色想蓬萊塵心滌淨
緣耽古搜剔題名到薜苔

蓀壁山房在南山宋金應桂築

幽居曾卜翠微巔不愧風流陶令賢玉塵外絃清氣味角巾

羽警散神仙

爲宋時縣令入元隱居善清談
嘗著幅巾簪衣望之若神仙然

花殘半壁春歸

水夢醒空山月在天三十六梯何處所畫圖省識李龍眠

齊樹樓在石屋明方豪築

蘊藉爲郎便乞休移家湖畔築層樓千章影入琴書潤五月

涼生枕簟秋簷角山因羣佛著辟閒句有少師酬

少師夏公
謙曾贈以

詩

於今遺稿規齊樹

嘗著有齊
樹樓稿

多愧華簪不早抽

薩埵石在龍井

白石當年臥湖阿於今過客屢三摩空傳臥虎高風在

楊傑
詩解

虎錫常開飼虎石常在忘
軀度有情清風幾千載

不比成羊幻術多寶筏無人參鏡

象土花經歲長盤陀忘軀欲度情難已一片婆心奈世何

張之杲

字東甫錢塘附貢自江
蘇泰州知州祀名宦

府志之杲雲璫孫少入侍郎曾煥幕佐治文書入貲爲
知縣分發江蘇歷任嘉定陽湖長洲所至有聲擢知泰

州下車禁書差滋擾有案則隨審隨結民無拖累揚州
寇警危在旦夕之果首議籌備集團同守捐廉重葺書
院優定膏火在任十一年治行
稱最咸豐元年 卹贈道銜

黃薌泉 士珩 招集蔡氏木龕賞桂

故鄉久不歸歸來忽如客喜逢文字飲許我廁末席城西子
雲宅流水繞門碧絕無塵市囂堪助觴詠適奇花數盞排翠
蘚滿庭積前楹桂一株老幹出檐脊奇葩吐未齊清芬已先
溢居士一龕築於此永朝夕我從淮南來招隱有遺迹不爲
小山留僕僕殊可惜媿我汗漫游羨君煙霞癖高吟殊未能
聊以疥君壁

王汝金

字礪卿號醉墨錢塘人官兩淮
掘港大使箸味諫果齋詩集

王文萃序略醉墨詩
眾體咸備諸妙畢臻

游喝水巖題壁

已到懸崖勒馬時回頭怪石復參差煙波萬頃依山盡鐘磬
一聲度嶺遲踏葉更窮千里目捫蘿閒覓百年詩來游我亦

忘歸去

山有忘歸石
蔡君謨書

尙待雞鳴看曙曦

錢塘懷古

故宮遺址鬱崔嵬千載消沈劫後灰風景全非餘草木江山
如此況樓臺煙林黯淡悲嘯鳥輦路荒涼覆古苔淒絕冬青
枝上月一番憑弔一徘徊

望湖樓遠眺

郭外眾峯秀湖西遠寺陰好花含露活新竹帶煙深燕接差
池羽鶯調睨睨音歸來一登眺約略付微吟

讀孔北海傳

無罪公然殺大夫座中豪客一時無破巢有卵何人問慚愧

門牆四百徒

張烈婦詩

同里張季友妻仁和魏笏棠孝廉女也其捐軀奇特並世所希張祀堂廉訪偕里人合詞

爲請

旌余

賦詩以弔之

張之婦魏之女不識生何甘死何苦一心只以夫爲主憶昔夫病瀕危時刲股作藥不可治有意殉夫夫已知執手涕泣聲酸澌謂旣知有夫豈不有舅姑與其殉我俾我重厥辜曷若代盡子職爲我留須臾千金一諾確然不渝掩血淚效婉愉以爲一日定省稍疏虞他日有何面目地下相隨乎從夫而亾墮夫志背夫而存任夫事但求替夫盡孝實不虧直願爲夫殉節名不至夫兄夫弟逝溘然力奉君舅終天年姑病又不起婦曰事畢矣屬弟來省視視有書一紙身向九重泉下生心先十六年前死節婦死死特奇幃中婢獲相追隨投

纒飲刃均難爲空箱檢得爆竹數十枝擘開喜得硝硫屑非
此不碎心腸之石鐵鐵心石腸碎作霹靂聲不愧人閒一字
烈儒生高談殉君父轉念歸家計中沮星移物換志不更慷
慨從容足千古獨何人哉張之婦魏之女

錢

松

原名松如字叔蓋號耐青
晚號西郭外史錢塘人

譚獻傳略叔蓋善鼓琴精鐵筆工山水花竹篆隸藏古
碑舊拓皆有題跋家近清波門庚申之變知賊必自此
入先期具鴆誓死城陷遂與妻沈子范媳張并一女同
飲之麾使各還室曰今日得死所而男女可紛淆顛仆
耶語定遂俱死

新關里訪友

買舟富春渚訪友到新關水落青沙堰雲封墨頂山主人三
徑雅客子一身閒且與尋山館高風不可攀

蔣孝子故廬
爲留青山館

題畫

一曲青谿傍小橋開門興爲看山遙白雲與我如相約遮卻芙蓉半截腰

深深巖穴澹煙籠款款幽亭曲徑通采藥歸來天未晚杖頭掛得夕陽紅

查世澧

字熙臺號櫻園海甯恩貢著琴趣軒集

許註祥曰櫻園先生幼稟庭誥喜讀宋賢理學書家貧授徒因材而篤正襟危坐言笑不苟學者皆嚴憚焉咸豐辛酉寇至渡江中流風浪大作先生端坐如塑手鈔近思錄楷法工整人服其有定力年七十九無疾而逝

花谿古蹟詩

古樸園

東山兩字名不刊先生便是晉室之謝安旣不能屏迹林泉長不出又不能秉笏正色立朝端一樹何團團凌空天矯如龍蟠構室其上聊偃仰世人莫當危巢看莊家史禍忽波及

康熙元年事

無端古井生波瀾香姜片瓦歸烏有老樹半死空巔

阮宅南古墓今荒廢烏曉月落秋風寒

尙書墓

可經堂內鬼夜嘯世事如斯早逆料開門競唱我公來

徐公石麟

死於城內有

我公來歌直以一絲答九廟妙果山北有荒邱堪與葆光

居士稱同調爾時李成徐錦

十五歲

兩僕亦奇人同縊公側殉

公身惜乎南雷文未見徒使俠骨埋荒塵

楊士鋤

字湘園海甯人箸耕餘小草

杭郡詩三輯湘園耽吟詠斷句如翳曉白雲欺夢冷枕
臨流水洗心清疏雁拖雲橫翠岫亂風扶葉出林端嬾
酬世事常言病未絕情緣向種花燕颯晚
風時上下山街殘日半陰晴皆極有思致

三竺道中

隨鳥度寒翠盤旋忘力疲山高流磬遠樹老得春遲人影落

溪水香煙颭晚颭我來無別物對佛只呈詩

金鴻佺

字蓮生秀水藥貢侯選訓導著雙栢堂集

南匯縣志蓮生浙之嘉興人避亂僑居好古擅書尤工詩邑中名蹟題詠幾徧其放鵝亭懷李辰山諸作更擅勝場

莎哥行 有序

莎哥姓沈名世麒秀水人少無賴好賭博咸豐十年賊自丹陽東下陷數郡應募率鄉勇守平望力戰死之

生不願作多田翁酒徒無賴皆英雄又不願讀萬卷書彎弓擊劍輕頭顱莎哥一擲百萬賭笑殺人閒守錢虜睚眦必報恣橫行孝侯爲害能射虎鼓輦動地飛艤撞破竹千里何人攻子龍一身都是膽隻手直欲撓其鋒有如甯武忠武公功

雖不成心則同模糊碧血灑古渡髑髏提出無人顧英靈應
儷五人墓

賈敦艮

字博如號芝房平湖諸生著餐霞仙館詩稿

縣志敦艮學詩於武康徐熊飛嘉善黃安濤學古文于震澤張履叟縣姚椿故所作詩文皆有法度

餅山酒罌歌

破罌山積如山等醉魄千年呼不醒忍將九葉宋山河只向
西湖酬酩酊熙春樓頭風日鮮推場置處香開筵銷金日日
事荒譙那數半壁東南天甕天廣大朝廷小君相嘗騰歡未
了青衣行酒忘敵仇醉骨穹廬哭昏曉一聲白雁驚酣歌糟
邱已見埋銅駝尙餘瓦缶感興廢一簣長此青嶢嶢由拳城
北風吹雨痛飲鑪頭人弔古冬青莫問六陵寒有酒誰澆趙
家土

周

寰

字景遠號菊庵烏程人

董文敏秋景圖

指點江鄉路迷離落照中薄煙茅屋出曲徑板橋通水閣潮
侵岸林疏葉墮風輕縑幾回拂誰得似漁翁

孔傳曾

字魯人號省齋西安聖裔道光己酉優貢

浙江忠義錄傳曾聖裔也篤學有文家湖南村教授聞里奉母不出咸豐八年三月賊至其鄉妻妾子婦女孫俱投水完節傳曾以母在未死未幾賊再至縛之去遲明逸歸見母已自縊欲屍藁葬畢告門人曰母死吾何戀且爲賊縛豈可再辱沐浴具衣冠亦自經焉

送吳辛峯之任桐廬

行路難如此貧交別愈悲干戈非昔日花木戀明時母老不求祿君才必受知書生論報稱未忍歎衰遲

方宗城

字子維號碧珊隲子錢塘人道光己酉拔貢

錢塘懷古

鐵券何須照夕陽功資保障說錢王花歌陌上春長在錢買
人閒夜未央寶帶名駒傳富貴錦衣犀弩奠苞桑表忠觀記
豐碑峙俎豆千秋霸業強

都建臨安宮殿多中興帝子樂如何北歸泥馬忘沙漠南渡
金牛隔汴河德壽修真求錄牒圍場校射列嬪娥鳳凰山上
松陰滿輦道尋秋客獨過

半閒堂北閣飛螢賈相風流夢未醒小印壺盧鈴粉本祕函
玉枕揭蘭亭襄城警變蝦蟆鼓葛嶺平章蟋蟀經縱有題名
剡石壁杭州曲子喚誰聽

居士清涼矍鑠哉翠微亭側慣徘徊花天月地騎驢去兒女
英雄戰鼓回舊聖何時離雪窖偏裨幾輩列雲臺杜門不復

談兵事髀肉重生數舉杯

沈福謙

字子牧號搗庵餘杭人道光己酉拔貢軍功保舉知府

杭郡詩三輯搗庵選拔應朝考用教職選端安以憂去官後鄧軍門紹良剿賊徽甯

積勞保知府

賞花

翎威豐八年十月假歸聞鄧軍紮灣趾被圍星夜馳赴甯國時賊四集人止之日外援已絕勿蹈死地搗庵不

可閒道入見軍門軍門驚曰此何時若來何益天未曙密遣親軍引之出不數里遇賊不屈死

溪山清曠圖

世事如網羅役志殊悵惘清曠期溪山幽人自來往山色挹空翠溪流瀉清響豁我塵俗襟頓覺幽懷爽空谷託素心漫恣塵外賞撫景獨盤桓心遠意自廣詠嘯來天風皎如秋月朗此生平爲福豪情殊倜儻榮辱我久忘展圖契遐想

洪樹培

字子佳新城人道光己酉拔貢官河南延津知縣

張景雲曰子佳爲新登三溪巨族移家省城皮市巷改
一書肆售常刻而留善本所積頗富選拔
朝考以知縣用發河南歷郢陵光州
延津能舉其職改江蘇未幾沒

簾

織就緇雲細似絲鰕簾低挂碧參差茶浮嫩白香輕約花舞
媽紅影密篩疏篠幾莖縈澹澹微波一桁漾遲遲黃昏佇望
蟾光到正是銀鉤未上時

沈寶梁

字季眉桐鄉人道光
己酉拔貢候補知縣

訪蘭副使墓

并序

公諱剛中字坦生崇禎辛未進士爲南京給事中陳
奏皆切時弊遷山西副使李自成攻太原與巡撫蔡
公懋德分城而守蔡招陽和兵三千協守東門公慮
爲內應移之南關外後果叛調部將張雄守大南門

雄已縋城出降語賊東南角樓火器火藥所在賊遂
乘風焚樓破城入愁德自縊公結草爲二囚象李自
成及張雄寸磔以洩憤被賊脅使降不從殺之首旣
墮復躍起丈餘賊皆辟易門下士粵人路之謙與其
僕李自修尋得身首橐葬之賊去士民醵資歸其柩
頃修邑志因訪公墓而後嗣無人不勝慨歎爰立石
表墓並紀詩以誌欽仰云

秦關旣失險寇盜壓孤城太原危累卵逆鋒誰敢櫻維彼蘭
副使報國憑精誠論兵氣慷慨不計敗與成時有中丞蔡協
調陽和兵部將遣張雄分守南門營方期練精卒一掃烽煙
清豈知勢瓦解異志方潛萌兵旣爲賊應將亦爲賊偵甲申
仲春初風沙晝晦冥黃昏絕城出東南樓潰傾火藉風威烈

礮石飛震霆公時激忠憤縛草象囚形大書李與張寸磔昭
典刑填膺怒未釋性命鴻毛輕城山身與山罵賊何靖嶸髑
體血模胡頭頸凶鋒嬰距躍高丈餘螳賊心膽驚四十有六
人同時盡捐生昔公列臺諫正直聲錚錚陳奏切時病嘉納
動明廷慮兵爲內應移營先見明二百有餘載懷然仰英靈
成仁兼取義大節侔眞卿義從昔收骨歸櫬及時清安陵我
綰綬拜墓心忤忤寒泉薦秋菊立石表忠貞臨難不易節足
爲頑懦型

陳政鑰

字魚門號小樓鄞人道光己酉拔貢官江蘇候補知府

董沛曰魚門有經世才當流離轉徙之際倡義集中外
軍恢復甯紹兩浙既定郡中建孝廉堂濬河道繕衙署
學宮校士館威遠城礮臺感存敦安諸善舉畿輔閩晉
諸振捐靡弗與自文武將吏薦紳耆舊姻戚賓從四方
遊士泊豪商大賈外國酋長方外雜流日至其門接納
無暇晷判決公私裁答籤記咸中事理抱疾養病而以

事蹟楊前者
猶相錯也

錢塘壞古有序

吳越錢氏保境息民繇歷五王終於納土有功兩浙
甚大据羣書所載各係一詩所以誌不忘云

安國天鍾命世才黃龍夾騎渡江來直教董薛雄心阻未使
淮揚間道開上輔天星資倚枕錦城父老看行杯鐵幢餘憤
猶如見東府高雲莽蕩迴

東南盟主奉羣侯虐政能懲見密謀飛火飄魚憐賊盡鋸刀
戮鼠動軍愁天教小醜亾盧李帝仗雄軍鎮括甌一自玉羊
龍阜去至今人憶彩雲樓

妙年繼嗣霸圖成拓土開疆著大聲例革鐵錢紓國富詔宣
金鉞愜輿情祥開雉雠詞應賦采博梟盧氣未平救難不從

諸將議春秋脣齒有初盟

日輪遺夢費籌量世子垂旒天冊堂未許儉人參上柄特申
嚴令飭官常福州遠使誰屏翰稽嶺深居謝斧斯奉璽已傳
南郎拜金環空復鑄文昌

一鑑秋湖試戰航漫愁虹影入天長千秋盛典逢開國五代
餘灰燼僭皇詩集早驚陶學士相謀獨識趙平章如何佞佛
求元渺三百浮圖抵建康

錢學煥

字炳雯定海人道光己酉拔貢箸待月樓詩稿

東郊早春

巖陰海氣接蒼茫露麥煙莎徧水鄉一樹顛風搜敗葉萬山
積雪媚殘陽當門竹有迎春意遠道梅參太古香獨向伴雲
庵

吾鄉名下立怪他鴉雀爲誰忙

郊行

出門無幾里便過數重山平野綠如繪閒花紅不刪雨多苗
俯首石觸水成環拄杖徘徊久白雲隨我還

周惺然

字篤甫諸暨人道光己酉拔貢
官山西潞安知府著寶帚詩略

郭肇曰太守歷典名郡歸橐蕭然倚聲能得南宋
嫡髓詩宗向宋人自開生面箸雙紅豆餘詞鈔

諸暨陳大定善詩官守備從征苗挈扁舫行後果殉難
求遺稿不可得僅萬里煙波十四字挂人口因足成
之

羨公名將眞名士筆格詩囊雜箭戟萬里煙波愁白髮一天
星斗落清淮遺編慘淡驪珠涇熱血淋漓馬革埋寂寞荒原
三尺碣龍泉猶把淚痕揩

鑑湖秋汎

湖氣碧於煙因風盪作水搖搖綠楊柳故意颭汀葦倚樁漾
中流觸鷺飛還止暮色自西來斷霞拖魚尾隱隱聞魚謳笛
叫秋風起行當縫袷衫去訪元真子

游家坪題壁

昔聞胡盧峪盜賊萃淵藪今茲捧檄來宵宵穿雲岫怪石突
峻嶒撲人如奇獸蟻緣僅容趾俯視魂飛驟溯自明綱弛羣
孽捷獫狁負嵎孰敢攫蔓延卅年久觥觥趙使君名吉士知謀

富輻輳剿撫運神機埽蕩快爬垢迄今百餘年薰蕕勤耕耨
元氣賴涵濡漸漸望殷阜何物鐵柱冠訛言遽入奏御史馮清聘奏

定捕風起驚波挖肉作瘡痂永永爲成例一歲兩稽究供億

困窮黎騷累及雞狗市少醉人行雨泣路旁叟譬如無病時
先期施鍼灸雖曰防未形腐爛遍肌腠嗟此山中氓負痛等

拷扭萬一迫飢寒鋌險糜芻糗壘圻多碩畫乞早賜拯救

五洩寺題壁

孤刹依叢筱年來徑欲蕪秋憐花轉劫山與佛同癯窵穴龍吟細荒林虎氣羶日斜一聲磬拾橡下僧雛

郭璞墓

爪髮深埋闕翠苔玉棺遙指浪花堆葬書空作青烏祖幾見兒孫上冢來

余慶璠

字壽岑龍游人道光己酉拔貢候選教諭著吟香閣詩

將之信安夜泊浮石

江聲與山色旅夜若爲情已去仍依戀相知似送迎蟹鎧風裏暗豕棚樹邊橫不減故園樂今宵共幾程

秋夜

月明羣籟靜庭樹起涼風寒色露華下秋聲鳥語中亂山枯
籟響孤館一鐙紅徑草萋猶綠王孫滯玉驄

探梅

涇雲罨空濛寒香發孤樹不知風雪來獨立溪橋暮

王指南

字午亭玉環人
道光己酉拔貢

天馬山卽景

奇峯兀立勢巖巖圖畫天然萬疊山塔影半藏深樹裏人家
遙住白雲閒煙開漠漠田千頃雨過涓涓水一灣尙有坊題
遺蹟在攀藤還與剔苔斑

端木百祿

字叔總青田人國勳子道光己酉拔貢
候選直隸州州判署石門山房詩鈔

府志百祿幼承家學治易
好爲詩尤嗜金石文字

王贊化序略叔總一字小鶴克嗣家
學尤邃於易詩古文辭清超拔俗

宗稷辰曰閩寇竄沿海溫處境叔總奉母入山隱迹耕
樵以爲養寇陷浙西乃憂憤狂奔思集義旅常往來驕
陽濤暑中遂卒

觀音泥

一名觀音粉
出大嶺阜

音本無可觀泥亦豈能食胡爲西溪山奇饌傳自昔豈因瘠
土民難以食其力默補造化功年飢無菜色佛本誓度人蒸
沙了無迹卻笑頑懶仙飢來費煮石

山田觀穫

枯蒼之山多梯田層層直上山之巔高田無水只待雨低田
橫竄能通泉我過蒼嶺正秋穫打稻聲出晴霞邊村童午饁
捧芋出稚子拾穗攀蘿緣迎頭野老向我語水旱難免心憂
煎去年狂蜃挾水出梯田多被泥沙填平地歎忽成土阜焉
有力士開陌阡今夏驕陽幾爲虐得雨幸天無所偏天時更

需人力補手足那辭胝與胼官糧迫催吏如虎恣意搜索還
笞鞭吁嗟乎山民力田真可憐穀少那抵租賦錢

夢遊太鶴山醒後走筆記之

吾鄉山水畫不如披雲乾乙淩清虛

先大父易廬在乾乙峯下面披雲峯嗟余

十載東甌居夢魂夜夜歸易廬昨夢仙人笑相顧危坐滿身
滴松露跪而就視癰且清銀髯過腹雙瞳青低頭再拜乞長
生授我奇書蝌蚪形欲讀未讀叩厥旨孤鶴一聲人杳矣手
持祕本上峯巔玉女無言四山紫頗懼夔魍公侵淩懷而藏
之乘雲升白鳳青鸞作前導金光繞肩霞彩騰飛行鶴背幾
千里世界浮煙落腳底石門飛瀑聲喧豗隨風吹醒游仙耳
醒來寒鐙粟已謝夢境迷離半難畫會當歸守劍石旁篆卦
敲爻飲元化

訪秦淮海監酒稅處

青山斜枕綠楊村拄杖尋春日未昏孤盞難逢秦學士殘碑
爭揚趙王孫鶯花寂寞羃祠宇煙雨荒涼鎖寺門回首天涯
成遠別一番惆悵一銷魂

秦淮海酒瓶歌

白雲山人贈我淮海之酒瓶外質古樸中瓏玲云是姜山腳
下土中出土花斑剝莓苔青我聞姜山昔爲榷酒處淮海風
流杳難遇黨人姓氏蘇門留壓捺頭銜麴部署酒星謫下枯
州城淪落一官何重輕人爲先生心不平我謂先生生當濁
世乃得揚其清嗟彼毒手亦可感落職適成先生名不然此
瓶久矣埋荒煙韜沈猶得形自全何以造物年深不忍祕幾
經歷劫仍復留人閒令人摩挲舊時物感遇弔古長流連君

不見侯門當日盛鼎盤金相玉質工雕鏤一朝勢敗落人手
收藏終復羞權姦卽看此物出黃土顯晦雖細非偶然其中
呵護有神力醜質反藉高名傳我欲攜之南園去買醉照眼
鶯花趁姿媚但悲詩人已往如灰塵孤亭冷落南園春南園
春老吟何苦嘯鳥無情花不語一自藤陰夢不醒溪山風月
今無主飲君酒聽我歌百年歲月愁蹉跎人生難得朱顏酡
鶯花亭外春風多有酒不飲當奈何吁嗟乎有酒不飲當奈
何

舟泊石門登眺

石門山在縣西七十里道書爲石門洞
天臨大溪兩峯壁立高數百丈對峙如

門

一徑入晴翠孤亭支暮煙林深嵐氣合峯轉澗聲圓野客攜
樽過山僮埽石眠欲尋謝公蹟絕壁有飛泉

石帆道上

石帆山在縣西一百二十里高百餘丈截溪狀如檣帆

峭壁平於削如帆掛渡頭半空銜夕照孤勢截溪流但解棧
鴉陣難煩送客舟自從開闢後終古幾曾收

石溪

石溪灘在縣境內白節灘東五里石溪之水自北來注之府志謂之雙溪

青山不渡水到水自蜿蜒花徑高於屋松聲細似泉亂帆春
樹外斷磬夕陽邊游客倦忘返前溪已暝煙

蕭迺甲

原名馨字笠仙海甯增貢

許莊祥曰笠仙文名藉甚工聯體元瑜書記傾動公卿橐筆江左最久與朱筱漚廉訪交誼尤篤

蔣母徐太安人節孝詩

瑤池陋說人閒福五十六年電光速天荒地老名不刊女貞
化作交讓木陶陶我昔交蔣侯冒暑弔唁來停舟爲言懿行
記萬一慟絕還蘇嗚咽述嗚呼母之節肝腸古冰雪嗚呼母

之孝破涕承歡笑尊章有命兒嗣夫丁年襁褓猶呱呱期兒
長大訓兒學縷縷心血危慈烏悲哉兩世惟一孤伯氏有後
仲詎無願以大義前告姑承睫淚與聲俱枯吁嗟乎母之賢
明有如此有此母乃成此子硯硯高致人所望隱居奉母隨
孫行讀書爲善母之教報答愛茲春暉長奈何顛顛到朱萼
尋竭三芝並五藥獨行所至神鬼驚一時爭說元卿名卽今
哀思纏寸草行閒寫出吞聲稿爲彤史地傳其真羣公袞袞
詞紛陳誅德敢以不文補夜雨空階韻淒苦紀時已迨冬十
月木落雙峯眞面出綽楔照耀千萬春嗚呼母節兮岬岫同
嶙峋

孫祖珍

字寶三
海甯人

周在恩序略寶三天姿卓犖胸襟灑然翰墨皆妙絕尤
刻意於詩體素羸弱旋得瘵疾夢得吟肩日瘦一日而

吟哦如故所嗜在此

不自知其病之深也
朱昌言曰寶三詩格調風神超超入古藹如明月穆

若清風重披墨滓淚落行閒人琴之感胡能自己

孟夏卽景

一架薔薇小院中曉來滴露十分紅送春纔過桃花雨入夏

新迎棟子風丙夜鐙檠憐我獨卯君詩調有誰同時讀弟年近作

來拋卻巾箱集不學騷人學醉翁

旅居

芳草遍天涯韶光滿眼賒曉雲迷竹徑新雨逗梅花風雪朝

來緊刀環夢裏家自憐常善病腰帶幾回差

蔣士燮字理齋號藹人海甯人

許澹祥曰藹人先生與其從兄壽廬名葆圻者並以能書名里中持牋握筆屢錯於門對客揮毫衫袖俱墨

吳黼廷兆鵬見過坐雨息誼草堂用漁洋雨止韻

一雨蘇山睡溪流韻作琴鳥聲桐葉底蝶夢菊花陰移屐來
知己銜杯得素心聯吟忘晝短夜色動寒林

朱嶧梧

字幼舫海甯人著

許仁杰曰幼舫漸潤庭誥復受母夫人姜守愚德嫻之
教毀齒能辨四聲嘗詠蠶豆花有破萼渾疑黑蝶飛之
句爲時傳誦

舟次張店

風緊舟行疾憑檣逸興增平吹帆十幅狂酌酒三升老樹懸
殘日危橋絡古藤夜來雲乍合細雨暗孤燈

史元善

字淡如號淵琳海甯人

貞烈詞

貞烈陳九姑爲太常閭陽後裔定衡之女字花

以教免屏居小樓偶折庭中柏枝插瓶忽生根盤結
蔥菁可愛十年相對一夕遽萎女卽整衣仰藥而死
朱氏感其貞烈遂迎
匾與品章合葬焉

蒼蒼淩雲姿凜凜表芳節柏生人與存人死柏同折感歎溯
伊誰卓哉陳貞烈鸞鳳雖協占衿襦未施結惻聞喪所天大
義心先決投井矢捐軀未遂空飲血借彼殘柏枝明示生理
絕詎知矢以貞瓶柏偏鬱勃荏苒寄浮生十年傲霜雪後凋
一夕凋隨殉返天闕清操兩相輝堅節兩相埒不有柏離奇
安顯女英傑龍山遜其高花溪遜其潔爲吟貞烈篇足補瓶
柏說

許誦咸

字應甫海甯人
著玉海樓遺藁

許莊祥曰先兄委稟過人工篆隸尤好吟詠未冠詩藁
盈寸顧體弱學劬又以先母喪哀毀骨立一病不起年
僅二十有二先兄靖甫宰梁谿謀付梓嗣官署不
戒於火藁亦燬搜故篋僅得數首聊見一斑而已

落花

畫簾黯黯雨緜緜紅紫飄零劇可憐一帶樓臺尋夢地六朝

煙雨送春天舞慵晚燕空投翦飛逐游驄緩著鞭底事封姨
太狠藉多應歷劫蕊宮仙

韶華誰與惜恩恩有客淒迷舊苑中蜂蝶三生成幻夢佩環
一夜嫁東風春深草色迷香徑晝靜煙痕鎖綺櫳不盡天涯
搖落感遺懷莫放酒杯空

朱嘉玉

字子信海鹽人
著宜蘭室詩鈔

縣志嘉玉敦孝友工文章慷慨尚氣節咸豐辛酉賊陷
澉城虜其兄嘉淑去嘉玉追及之日兄多病願以身代
情詞懇切賊釋其兄以嘉
玉行至松江罵賊不屈死

聞衢州警

嚴疆鎖鑰重三衢豕突何緣逞負隅閒道陰平工抵隙重關
天府竟疎虞常山之陷賊由浦城而入縱橫已決藩籬固支蔓難勝斧鉞
誅可惜桃溪好山水狼烽極日照榛蕪

楊逢南

字子鶴海鹽人
著香禪詩草

縣志逢南性豪放好吟詩出游淮海詩益工早喪妻子
年八十子然一老吟嘯自如有句云病借詩書爲藥石
老栽花柳當妻
孀聞者傷之

舟泊丹陽

老漁約我宵同夢淺水蘆花共泊船
幾點疎星羅遠樹一鉤新月破寒煙
強扶酒力挑鐙坐不奈鄉愁攪客眠
卻怪荒雞太多事膠膠嘯徹五更天

自題便面

投閒久擬老深山又被西風引出關
可是前生李長吉錦囊無句不輕還

野雲斷處炊煙接茅屋無鄰老樹依
一路泉聲隨客屐不知山色上秋衣

張

潮

字香雪歸安人著
鹿蔥花館詩鈔

夜泊石鐘山下聽鐘聲獨酌大醉作

玉皇大宴馮夷宮夜遣水神撞石鐘石鐘不響水神怒鞭撻
紫鳳驅黃龍重門洞開萬花簇百八蒲牢聲愈促笙簫圍繞
翠雲裘猶唱霓裳舊時曲小泊野人不與筵羽觴別賜沙棠
船酒酣塗抹石鐘記湘妃漢女皆踟躕九重一覽容爲動狂
語驚天豈能用詩聲擲地與鐘爭驚破仇池九華夢

章錦成

字美中孝
豐歲貢

擬王建蕨蠶詞

蠶上蔕閉門時覺當心育采桑饅食甚慙慙疊疊天蟲作繭
速繭大于栗白于霜今朝喜祀馬頭娘歛雙紅袖拜致祝願
天不雨和風燠箔間無鼠又無蠅儂家蠶花十分熟轉盼籬

煙煮繭香絲賣街頭價正昂納了官租餘糴穀一家老幼充
飢腹

王

信

字于一號近溪慈谿歲貢
官湯溪訓導著萬卷樓稿

題秦少湖琴月圖

謾謾松下風皓月照西嶺萬象歸空虛微聞孤鶴警何人撫
瑤琴俯仰神俱靜高山與流水悠然心自領是時月正午白
雲澹孤影俯仰知音希長空露華冷

徐

棨

號香坡山陰人著
世竹香莊存稿

看桃花卽贈園主

桃花萬樹擁柴關消得山居盡日閒不許門前有溪水怕流
花片到人閒

題王瘦峯寒江獨釣圖卽以送別

世路茫茫到處難
幾人安穩守魚竿
冰心貯向玉壺裏
君自不愁風雪寒

夜泊揚子江口

邗溝趁曉放輕舸
渡口收帆月已高
遠火亂明瓜步市
逆風怒捲廣陵濤
大江東去終何極
烏鵲南飛亦自勞
醉煞謫仙呼不起
別無人敢逞詩豪

游山

石磴盤空路幾重
荒苔滿地絕人蹤
雲中雪影飛晴瀑
天半濤聲吼古松
峯抱孤村先見竹
寺藏深鳴但聞鐘
此間洵與凡塵隔
亦有眞仙或許逢

謝梁參軍見訪不值

雲外看山常去早
溪頭踏月便歸遲
近來蹤迹原難定
除卻

閒鷗未必知

偶感

六經已足費研摩諸子紛紛復奈何說與祖龍應不信今人書比古人多

賣畫

客中隨意寫荆關雲樹千重水一灣充作酒資君莫笑勝他人賣故鄉山

曉眠

春倦貪曉眠日高未開戶忽聞雙屐聲知是夜來雨

重入吳關

兩度出吳關仍攜一劒還白頭關吏在笑我鬢毛斑

同丁雪舟夜歸

荒野霜風裂布袍夜深走馬聽狐嘯夷門好客今誰是莫便逢人意氣豪

車

暄字松厓上虞廩生

上虞詩集松厓輕財好義鯁直可風喜吟詠如旅館云愁懷經雨碎病骨得秋多感懷云筆緣得手頭將禿桐遇知音尾已焦皆佳句也

東山懷古

茫茫雲水滿東山目斷南朝勝地閒宰相風流詩酒裏蒼生心事夢魂閒縱教絲竹曾留感如此林泉亦解顏踏遍莓苔尋屐齒落花無語夕陽殷

湯敬躋

號六園嶧諸生箸小梧軒詩草

秋柳四首

條條濃影失參差秋老關河柳萬枝十里長亭殘月冷一場

春夢夕陽知擬開青眼慵無力強舞纖腰瘦不支寄語離人
休折贈從今已不綰相思

角聲催斷灞橋西搖落西風黛色淒故國怕逢寒雁至驛樓
愁聽暮鴉嘯煙籠板渚泉流急露下江村酒價低一自錦帆
歌舞散蒼涼何處弔隋隄

裊盡平蕪萬縷長攀條爭奈淚霑裳烏栖曲裏西風急白下
門前細雨涼金縷飄零三弄笛玉關哀怨五更霜祇今憔悴
章臺路莫話風流舊日張

拋擲黃金記少年江湖回首興蕭然簡書久滯皇華使詞客
空吟白苧篇亂抱晚煙眠古堠直通寒信到窮邊青青曾送
陽關客歸路重逢亦可憐

姜文衡

字北垞黃巖貢生
著北山詩鈔五卷

縣志文徵少從夏寶田賦鶴泉松柏峯諸先輩遊
敦篤力學通經史善詩古文詞著北山文鈔六卷

過騰空嶺至萬年寺

台山初入境已覺萬山低地僻誅茅少峯回過嶺迷危樓穿
樹出密竹拂雲齊爲問曩猷事殘碑夕照西

海天吟

市廛煙火聚訪勝愛江鄉小佳船爲屋長隄網作牆濤聲喧
井里佔客集帆檣數里魚鹽富真堪壯越疆
候火雲烽熄江壖驛路春士猶小鄒魯風亦古齊秦矛戟歌
同澤錐刀競要津所期循吏治閭里盡還醇

題天峯精舍

峩峩石丈人半空撐鬱律天峯從天來犄角作勍敵高欲摩
蒼穹孤乃絕人迹下臨千仞溪奮怒怪石立上有招提宮僧

房構密栗余本草閒人抱此煙霞癖一再陟茲山林巒棲魂
魄山靈招我來挾書坐一室星斗落窗櫺雲霧坐甌甌嚴冬
氣鬱盤陰崖霜雪積長歎寒風號高歌山鬼泣吟罷閒無人
蘸墨書粉壁

拜經臺觀日出

晨鐘初動披衣裳起看初日升扶桑天雞唱曉風浪浪客子
踐露登高岡疏星頽頽燦天章東方睽睽搖曙光羲和弭節
仍潛藏六龍緩轡息康莊須臾萬丈騰彩芒日氣雲氣戰元
黃滂起一帶連帆檣展作樓臺霞爲牆或如城闌如橋梁或
如車馬如旗槍點染草樹排雁行變幻明滅難具詳海水忽
立射天閭捧出火輪照大荒金支翠蕤紛飄揚貝闕珠宮爭
鬻皇燭龍懾伏如犬羊魯陽何敢撓戈鉞是時九月天氣涼

秋山明媚出曉妝萬象羅列森在旁目極千里接混茫東瞰
四明西括蒼鷲峯雁宕鬱相望茲遊奇絕來仙鄉振衣長歎
喜欲狂會當快飲三千觴埽除世事如秕糠朝朝此臺挹瓊
漿上與群仙驂翱翔不隨斥鷃笑鳳凰

走馬岡

元政不綱九有覆黑蜮蜿蜒起澤國洋嶼原頭草色青瀛壖
校戰飛羽鏃據竄顧盼藐羣雄捷下江皋馳驥足公孫躍馬
何足云鳴鏑控弦逐原鹿鹽徒草竊竟高翔我舸大扁出溟
洋貔貅十萬東南下孛羅伏匿驚櫓檣慶元三郡歸掌握鼎
足儼然分陳張日月揚輝燭火息至今父老談方王真人自
出庶物首英雄割據亦非偶猛氣能蒸甌北雲閒情猶說江
南柳乃翁馬上不知書文采風流開厥後況復納土庇羣黎

盛業鴻功垂不朽越東霸氣今銷兵四百餘載塵氛清此岡
祇合牧牛馬此時久已屠鯢鯨潢池莫弄盡赤子聽我高歌
走馬行

江占梅

字遇春號廉叔西安廩生

西安懷舊錄廉叔有雋才究心理學性剛直
咸豐間洪逆竄衢被執大罵不屈遂遇害

鄭琴浦先生索生輓詩書此答之

靖節生前作挽詞夫君曠世一相思酒人放縱輕年月畸士
孤零忘別離豈恤邱山與華屋那分春樂與秋悲男兒磊落
由天授應有千年想象時

馬治準

字勦平號西園建德廩生

家傳略西園成童失恃事繼祖母以孝聞家貧苦讀尤工書畫

課耕

今年農事艱農器一無有聲聲布穀曉惆悵此南畝草屋五六閒毀敗已八九憶昔播種時夫耕婦隨後親戚有情話留飯翦春韭何堪離亂餘春暮一回首

田嘉修

字敏齋慶元巖貢

縣志嘉修性孝友善屬文工楷法與弟嘉瀚齊名

百丈龍湫

浩淼銀海翻鯨波神龍蟠蟄通星河八荒伐鼓承帝訶雲垂水立走靈鼉山湫百丈石嵯峨九淵幽深蔓薜蘿嵩山五叟遠來過雷陽挂壁躍金梭會時呼兒策青羸風伯前驅反偃禾巖窟清邃息滂沱霖雨潤物天下多

蔣昌期

字偶生錢塘人道光庚戌進士官處州教授

處州府志昌期風儀端整文學博瞻持躬儉約勛士勤懇己晉秩知縣適寇至顛沛以疾卒士林痛惜之

四十初度

平昔過從輩相知氣誼真而今契闊久獨有夢魂親貧賤見
本性文章信有神山城困寂寞青眼更何人

江湖醒昨夢傀儡冷旁觀欲廣絕交論長歌行路難偶然逢
釋褐到底負儒冠莫話封侯計非關骨相寒

濮慶孫

字壽君號秋農仁和人道光庚戌進士官至直隸順德知府

張景雲曰秋農由庶吉士改官農曹再轉禮部劾而沈毅寡言笑慕汲黯之爲人清剛自矢與人交必衡道義善輯通鑑之有涉兵事者都爲一書曰通鑑經武錄

題丁午橋尊甫負米讀書圖

讀書不服賈無以供豆觴負米不力學無以博顯揚兼之不
可得孝子心傍徨扁舟運菽粟舵樓度書囊波濤勢滾滾誦
讀聲琅琅歸家奉甘旨下筆能文章萬卷羅胸臆英名畫膠

庠優行貢天府高等試明光公卿競折節杞梓滿門牆需次
入官學一舉所名場誰知秋風起化鶴歸江鄉十年館京邸
祿養願未償齋志忽焉歿親朋咸感傷幸哉兩賢嗣辛苦繩
書香仲氏繼先志萃鹿奏笙簧鳴琴宰劇邑爲政尙慈祥我
攝瀛洲郡來登單父堂畫圖荷持贈巨冊題琳瑯省識圖中
意身兼士與商及門憶師語圖寫師衷腸伯氏重摹繪霜露
增悽愴天道重懿行理應後嗣昌蘭蓀復競秀先後擷芹芳
百年懷祖德繼起胡可量從此高門第悠悠漢水長

慎毓林

字延青號芙卿歸安人道光
庚戌進士官翰林院編修

積雨

積雨久不止遙山雲氣迷林垂野花重水接石梁低鷗鷺夢
偏穩鶉鴝聲亂嘯空堂人意寂得句半無題

周星譽

榜名譽芬字昀叔星醫弟山陰人河

譚獻曰昀叔入詞館年未三十天懷冲曠迹似金門之

隱資深擢臺諫平進粵西分巡稍遷廣東運使未久謝

病流腐吳下以歿少擅高名而遠想宏域詩文俊逸屬

草逾年月輒削之入都傾襟投分如見晉宋間人涉筆清超

草堂詞刻之入都傾襟投分如見晉宋間人涉筆清超

使人意遠今惟金淮生運副栗香叢書刻東樞詩數十

篇高接中唐次亦似明季嘉定四家

之流日記二卷往往似世說新語

孫德祖曰同治辛未余春闈報罷方大困許竹簣同年

書十四言見贈云未仕此身猶屬我除貧何事不如人

蓋叔昀未第時語也今其季弟季貺刻鷗堂牘彙未見

此詩知君詩散佚不題又可見君少年自負亦不淺也

乙卯元日出門閒行拈人字韻示寄公

廟場簫鼓賽新晴市柳搖門綠未勻押券舊逋多酒債到門

賀東半詩人自書小勝禳除俗預檢清遊報答春笑憶西清

早朝侶馬蹏紅驟六街塵

渭長乞予畫扇醉中走筆寫山水靈芝

君自畫君畫我自畫我詩我眉自能顰不能效先施造詣雖
不同各抱千古思清氣孕肝膈卽物皆吾師濯我塵土筆寫
君冰雪姿娟娟采珠人蕉萃荒江湄我欲招之來貽以雙紫
芝相期宛洛閒耕煙驂青螭結佩貞歲寒此意君儻知

丙辰二月二十七夜與陳珊士卽事聯句時同寓都門

元通觀

勞勞四十日初卸遊子裝

叔

塵市苦酬應卜宅鄰空王

珊素

心得吾子襍被來對牀

叔

閉門敢清影貴賤良所忘

珊

誰令

兩恨人寘此冠蓋場

叔

進退不自權跼蹐同羝羊

珊

旅食亦

大難日聽米價昂軍書急星火

叔

千里來倉皇似聞蕭碭閒

羣盜方鴟張

珊

又聞奔牛陷直掇南北吭

叔

消息日千變恍

惚難具詳

珊

大江多烽煙故鄉不可望

叔

心逐南飛雲迢迢

赴高堂珊

潘孝婦詩

孝婦蔣氏吳縣人適同縣潘君遵範夫沒誓以身殉姑諭止之乃事姑撫孤以十指供甘

旨凡六年姑沒孝婦以哀毀卒其子增貢生鍾瑞撰行略徵詩

結髮事人義終始從死不難難不死

解一離離陵茗白華絳跗

宛宛鴛鴦化爲孝烏妾生戀夫妾死負姑上堂入戶中心踟

躅

解二膝下何有呱呱黃口兒死代兒有新婦新婦而死誰奉

阿母

解三姑繒裘妾弋綈姑肉拌妾哺糜中裙械寄榛栗梨姑

瘠妾瘠肥妾肥紉箴十指血出漉空帷霜燈雞膈膊面姑笑

嬉背姑哭

解四當寢不脅當沐不膏姑身妾心七年一朝下牀

扶掖上牀敬抑搔姑病有喜妾病作妾病雖深妾不覺

解五參

苓朮矣灰釘漆矣姑棄妾矣妾事畢矣北辰高高下照當心

孝婦殉姑死距姑七十五日惟夏四月年庚寅

解六孝婦誰蔣

清門長適潘詩禮孫結髮事人義終始代夫養姑爲姑死地
下隨姑尋孝子

七解

陳寶珊觀察

景謨

左遷甯夏郡丞索詩贈別

聞說松州道秋深尙鼓鞞客心將朔雁送爾固原西榆葉關
雲重桃花磧雪迷隴梅無便寄南望迴含悽

太原三歲別薄宦竟何如俸厚全分客官閒更著書風花晉

祠晚煙樹薊門疏老我東華路勞勞感索居

君曾官冀甯道

馬背一樽酒屬君何限情途窮爭氣節亂劇出功名射虎邊
風暗呼鷹隴月明毋將遷謫意寥落負平生

曉發紫荆關

曙角散邊聲重關俯杳冥雁羣低砦黑馬色接天青日馭迴
西極雲開見北庭九京松柏樹蕭颯不堪聽

閉門

閉門敢孤影人鬼罷相憐清氣生高餒沈憂中獨眠秋聲依
磬肅夜趣溢燈妍合眼寒衾底寥寥見百年

蘇虞階中丞

鳳文

伏戎圖

中丞宰廣西羅城降土寇余
入筮得伏戎於莽之爻因繪

圖誌事庚午十二月
中丞命題排律五十二韻

昭代

中興佐惟公偉績彰三朝儲大用一德昇

今皇草木威聲遠風雲戰氣蒼乘時爭鼠竊應運獨龍驤盤
錯推虞詡澄清志范滂名應祠白馬讖早兆黃塵下邑艱生
聚孤城賴保障搜窮都尉粟焚盡督郵桑毒霧連衡桂妖星
埽角亢雞竿春砦影狐火夜祠光大府初班檄援軍又趣裝
師期傳箭速將令舉棋忙事亟空拊髀塗危孰掄吭帳前參

反側榻下費猜防鄉社團弓箭山棚具酒漿空拳爭赴敵制
挺各知方檣楷安于箭沙籌道濟糧搗虛聲已敎用閒策尤
長羽騎朝飛電牙旗夜捲霜地中鳴鼓角天際墮欃槍敵氣
終犁穴追奔遂越疆竟陳洄曲捷佇見易京亾孱令騎豬竄
驕兵射雉行連營候鳥散殘寇復鴟張瘴雨連溪黑蠻雲壓
箐黃一軍孤注弱數道逆氛強盾墨書飛動韡刀誓慨慷失
機同繫狗悔罪忽牽羊恩信孚梁國威稜瞽武鄉沈機何待
卜眾志固難量九筮看成兆三爻悟斷章金門臨太乙玉帳
坐文昌蜀壘雙旌下聊城一箭塘心先輕虎穴氣已懾狼隄
積甲齊山下投戈拜道旁大人占郭令慈母仰蕭王濁浪三
門險陰嵐十崙涼安危全局寄利害隻身當置腹誠胥感攻
心算特詳新傳赦張燕爭羨用文鴛志卻當歸寄情輪續命

湯霸才歸駕馭壯氣助飛揚遂荷酬庸典行徵賚弼祥總師
磨繡節開府肅牙璋次第芟羣盜從容挈大綱制兵唐禁衛
飭吏漢循良瑞象來殊域長鯨徙遠洋獐花蓼茉莉蠻酒醉
檳榔銘記燕然勒勲高

太室藏趨

朝迎劍佩還鎮錫軒裳南裔豐功著東山晚節香
紫光霄漢外銅柱表炎荒

江程

牂牁南上鷓鴣嘯迢遞江程望轉迷傳箭心懸關日外寄書
目斷嶺雲西涼州博得應須酒函谷封來未有泥夢入玉堂
鈴索動水牕殘燭雨淒淒

雨次上渠灘

江風捲地散蠅蟲涇翠堆篷曙不分遠峽猿聲青隔雨陰崖
蛟氣白連雲一官憔悴投荒錄萬里悽涼誓墓文十日長飢
行李乏媿他豪客夜知聞時有盜警

甲戌冬日柳州郊行

紅旗小隊沂晴郊迎候休辭驛路遙

時中丞巡閱將至偕郡僚赴四坊塘迎謁沙

草瘴雲鳶跼跼江楓殘日馬蕭蕭病羈荒徼同遷客貧戀麤
官負

聖朝苦憶論心王輔嗣吟魂零落不成招

悼王定甫銀臺

何鐵琴司馬以便面索書口占二律奉贈

拳帷炎徼喜班春叱馭危疆感致身祖德仍留遺硯舊門材
爭羨佩刀新官聲象郡劉中尉文價雞林白舍人自是耳鳴
陰德厚傳家定有玉麒麟

廉守風流入畫圖衣冠了鳥世緣疏貧無可退知爲政者不能閒賸嗜書理勝固應言語妙氣和終覺性情孤怪來相對忘形迹落落風塵雨腐儒

丙子二月夜泊南鄉卽景

舵樓晚飯古榕陰擁鼻篷窗效越吟月氣曉紅知晝熱江光夜碧覺春深蒸溪霧毒蛇懸樹掠徑風香麝出林七載瘴鄉青鬢改浮家長繫故園心

辛巳十月由隆安入果化卽事遣懷

入峽天黏石緣江路斷泥星流蛇蠱出月暗虎倭嘯箐壑山魃屋藤懸峒獠梯炎荒南去僻風景日萋迷

杜

聯字耀川號蓮衢會稽人道光庚戌進士官至內閣學士兼禮部侍郎銜

行述略府君篤信朱子之學類鈔薛文清讀書錄以授鄉後進督學廣東注白鹿洞學規以授學子晚居西湖

與俞曲園居士彭雪琴相唱和求詩乞花裁箋互答暇則登山四眺爲諸從人言湖山故寔蕭然自得其胸次高曠一時歎爲不可及云

孫德祖曰先生早歲以經義詞賦發聞坐家貧開門授徒且二十年請業者歲恆數十人先生爲點定文字必求無豪髮之類而後安嘗批閱課藝至三鼓起便旋庭中眩仆者久之其劬也如此中年甫通籍館選後假歸將理舊業以老會鄉郡多故不得已回京供職再遲翰詹大改並蒙

宸賞

拔前列遂躋卿貳簡命

親學粵東使竣請老青鞵布襪日與田父野老齒坐敘鄉曲誼雖婦人小子胥忘其爲二品大僚也德祖童子時嘗以文進質過蒙獎許故知之尤詳竊謂人生窮達理宜樂天知命惟陶成後進責在先覺苟自問足以造就人材不宜珍惜心力而有所綏固不必望報也然如先生者大造亦何嘗負之哉

孤山

天風送好山吹落西湖曲四面空依傍水浸一團綠不識伊何人以孤爲之名隄之以白公橋之以西泠和靖昔好事結

廬在山趾種梅與參鶴妄謂妻若子山孤人亦孤山乃屬林
逋于今八百年又來一蓮衢詩狂得雪翁酬唱翻不孤

暮春之初雪琴尙書攜菊萋滿筐分插蘇祠賦此

攜鋤戴笠蒔新芽不種梅花種菊花料得老髯應絕倒孤山
今又屬陶家

一雨連朝互曉煙東風披拂作春妍明年定鼓重陽棹來薦

坡仙配水仙

徐光第

字春衢蕭山人道光庚戌進士官河南洛陽知縣箸含清堂詩存

葉爾安曰春衢初宰洛時皖寇入境伊闕左右多被蹂躪而山寺幸免劫火後有詩紀之曰怡憑仙佛護無作宰官羞其經世之心可見

懷慶被寇余仙甫太守裴韶甫大令力守孤城五十五

日而圍解詩以紀之

堂堂賢守令兩月保孤城雀鼠無遺餉豺狼忽退行汗青標
氣節垂白建勳名難得傳人在枌榆亦寵榮

裘嗣錦

字鴻秋涇人道光庚戌進士官四川鹽縣知縣

家傳略鴻秋少雄於文仕蜀後講求吏治漢夷率服有公正廉明惟良折獄之謠

落紅吟十首

錄二

涼秋忽已深涼風吹滿襟何處飄紅葉徘徊不敢吟
殘紅戀故枝風勁落偏遲良辰不再至長懷新綠時

汪文棧

字苑亭錢塘廩貢候選訓導

譚獻曰苑亭先生學通羣經爲鄉里大師從游者多所成就居家以身教婦孺皆知名義咸豐庚申杭州陷家
人舉火自焚二子從煙燄中奉先生出走江西問閭傳
食病歿豐城舟中文章雅贍經史皆有纂述藥草數德
遭亂盡失存者經義彙鈔五十
卷襟文二卷苑亭遺詩一卷

天竺山

雲氣濛濛濃欲滴樹色參天同一碧穿林記經九里松尋蹤
忽遇三生石迎面一峰如蓮花連環三竺相周遮中有流泉
飛百道懸崖曲赴疑修蛇聲清便似廣長舌嘯鳥時聞復幽
絕經幢丹井趁閒尋捫讀并教薜斑裂白衣仙住隔紅塵紺
宇琳宮幾處新春社已過香市散鑪煙猶裊悟前因不少齋
心虔致祝秧田水旱三分足但願時暘頌九衢慧光普照恩
同沐鐘動斜陽晚課催牧童橫笛送歸來詩懷略似坡仙放
也乞雲根到處栽

次韻擬東坡書王定國所藏煙江疊嶂圖

是誰畫此江上山九點直鑲齊州煙千巖萬壑數不盡臥遊
欲到心茫然但見虬龍攪空鼇起立一綫倒挂天紳泉潄潄
長河竟東注厥勢莫遏鯨奔川雲晴霧雨雨不辨誰歟鼓櫂

行欲前危橋轉處泊漁艇箇中疑有桃源天
俗忘機鷗鷺無嫌妍買山儻許踐宿約數頃合問桑麻田卻
憶嘉陵山水三百里道子手筆誇當年尺幅而今那可得獨
此秀潤逾嬋娟張壁擬尋謝公屐讀畫喚醒黃鑪眠猶恐妙
墨通靈累癡虎六丁追取成飛仙一再摩挲不忍釋訂交金
石良有緣安得丹青好手爲我寫臨本我亦醉揮秃管酬長
篇

張日熙

原名炳字翼之錢塘廩貢候選訓導

杭郡詩三輯翼之天才亮逸道光閒學使者羅吳趙三公並奇賞之佗係不遇卒死辛酉之難

錢塘懷古

江雲海月秋千里孤帆夜翦錢塘水錢塘花鳥怨興亡豎子
英雄呼不起禹航分地始彭錢仙蹟荒唐事偶然慶忌塔前

聞鶴唳伍員祠下斷龍泉龍泉有淚埋碧血狐狸夜拜星精
沒斬佞終留太宰頭報仇空剗荆王骨十丈驚濤吼雪條虜
夷嫵媚擁靈簫三千年內無窮恨十二時中幾度潮潮聲東
走江岸古楚尾吳頭黯雲樹可憐遺石笑秦船終見新塘歸
漢土黃巾青蓋又三分馬上孫郎自策勦老將孤墳埋戰骨
降王妖石斷雄文金粉南朝怨蘅杜一抔葬玉西冷雨不覺
楊家換李家依然柳浦環榆浦此時六井漸膏腴此際雙門
列畫圖忠憤空懷褚僕射風流終付白尚書紇干山上嘯枝
凍錦衣不見含元貢俎豆文章太史才江山恩怨君王夢夢
中還我舊山河浙臉南來壯九哥子忍戴天虧孝甚臣悲負
日效忠多冬青花發蟾蜍缺蛻骨荒涼漆鐙穴鳳凰關翅曉
風淒驚鷺拳足寒冰冽白楊蕭颯玉鉤斜宮體猶開陌上花

金鳳歌殘遭掣搦紅鸚鵡損恨琵琶花冷繡鴛鴦瓦綠袍
影妬寒潭瀉斷雁斜陽古驛門琴歌爲問知音者

陳紅梅孝子詩

鐵馬飲江豪於虹嶺上梅花臣死忠韓盧繞山很於豹橋下
梅花子死孝臣忠子孝天地心乾坤閒氣梅花林誰補鬼中
董狐史催取天上楊蟠吟浣東陳孝子年甫十三耳從母避
賊賊忽逢賊逢母亟伏橋底天荆地棘何蒼皇母身已藏兒
未藏賊前攫兒索兒母空山無人梅花香縛兒其上要兒語
母兮免否繫兒口兒兮免否落賊手賊不得母怒及兒兒不
怕賊心有母鐵鎚鐵鞭兒願受兒喉如鍵膽如斗兒完無膚
脰無首紅霞片片梅花酒獬獬技窮棄而走兒今死矣終不
言兒不言矣母節完兒歸覓母母在門清香寒立梅花魂兒

魂傍母母老死母死魂返梅花裏兒血斑斕是梅蕊兒心酸
楚是梅子萬古明月結煙水東鵲橋畔孝義里吁嗟平閣部
大節招雲旗衣冠之葬猶傳疑孝子當年農家子邑乘無傳
墓無碑山精夜號木客嘯孤心訴與梅花知孤心訴與梅花
知年年香遍春風枝

裘元輔

字子佛錢塘廩貢

浙江忠義錄子佛外和內介工書畫求者戶外屢常滿藉以自給辛酉挈其妻率四子及長子婦投河攜長子椿壽走避猝遇賊父子並罵賊死之

垂柳

垂柳濛濛不減春婆娑池上瘦吟身半晴半雨風光老三起
三眠花事新雛燕樓臺青眼客暮鴉門巷素心人望中高蔭
濃如幄我願平分到比鄰

蔣恭亮

字賓梅錢塘諸生

黃憲清序略蔣子賓梅賦性醇粹秉懷淵冲撫

琴搗詞則清挹秋爽擊鉢按律則音翔莫報

杭郡詩三輯賓梅豪於詩酒游淮揚間跌宕文史聲譽

日起歸里就居西湖之濱吟嘯自得與從弟坦時相唱

和聯吟刻燭極一門之盛又嘗戲集同人

姓名爲酒榜以寓意辛酉與弟坦同殉難

題關衛農維甸鋤月種梅圖時衛農方抱

濃陰壓樹春沈沈月來照見梅花林冷雲飛舞香雪滾美人

一去嘯仙禽仙禽不眠踏冰凍紅雨催春綠陰重東風吹散

種花人冷香淒入潘安夢去年今日南枝開花光髻影同徘徊

風生環珮冷生袖夜深林下何人來月來照花花閒竹闌

干微紅畫簾綠可憐弄斷風中琴別鵲離鸞不成曲梅花梅

花如有知縱橫莫曳窗前枝一枝欲贈不堪寄碧雲日暮長

相思

孝慈庵

鐘聲來樹杪落日下橫塘閉戶息塵夢捲簾聞妙香讀經有
魚聽洗鉢召龍藏願問生公法根緣一笑忘

葛林園訪應敏齋

寶時

相思隔秋水來叩暮雲關日落鳥徐度花開僧未還談詩契
還想得意忘塵寰我有卜鄰願何年同買山

張步雲

字魯伯炳子
錢塘諸生

杭郡詩三輯魯伯性耿介恥干謁知者交薦於當道終
不出年五十餘課徒自給食貧政苦泊如也辛酉之難
子乙卯副榜蔭棠
死之魯伯亦自縊

題元高尙書錢塘夜山圖歌

尙書夕宴蓬萊島瀟灑襟期出塵表一幅煙嵐腕下橫涼蟾
影墮山月小尙書者誰高房山畫宗顛米孰可攀龍飛鳳舞

繪形勝筆底疑挾風濤還題跋應倩謫仙李紅泥小印綴其
尾生綃圖就潑墨涼翦取錢塘半江水螺鬟倒映碧水深參
天萬木何蕭森林泉突過張伯雨澗壑遠軼倪雲林今覩此
圖略彷彿千峰合抱更奇崛瘦削芙蓉挂笏看隔林遠引鐘
聲出

鄒在寬

字敬五號辰伯志
路于錢塘增生

廬陵王氏世德詩

截竹爲杖越宿而蘇天親之愛慈孝之符淚痕猶在貞枝不
枯敷華擢秀宜棲鳳雛

匪屈子頌如陸郎懷一朝風木芬芳遂乖依依嘉樹慘慘空
階物理所感何必踰淮

楊國遴

字攬五號湘如錢塘人著寒
瘦吟四卷壺中小草二卷

浙江忠義錄國遜詩酒自娛不樂仕進性狷介家範整
數平居不苟言笑向氣節教子弟以植品爲先咸豐十
一年冬省城陷賊脅之不屈被刃死妻方氏家婦高氏
次女勤同時罵賊被戕長女敦聞賊入門先避密室自
經一家死節甚烈

杭郡詩三輯君所著尚有鋤月山
房賦稿二卷二分竹屋詞稿二卷

緝雅堂詩話咸豐庚辛之閒杭州兩陷文學志節之士
多離茲屋編詩至此神思不怡既哀諸君子殺身成仁

朝

百年養士之報如楊君湘如其一也生平好學愛名節
家訓甚嚴哲嗣春浦廣文仰承先志力學弗倦于鄉邦
文獻尤爲諸熟此錄之成深倚其力忠節之後宜有令

也子

山行

亂山黃葉墜獵獵鳴西風野水自然綠夕陽無限紅隱居慕
元鶴高蹈陵孤鴻我欲避塵俗結廬來此中

春日偕張叶篴湖樓晚眺

垂楊隄地綠粼粼畫閣臨流影倒涵日暮歸來雙燕子一簾
花雨話呢喃

水光山色混空濛無數游船集晚風遙指兩三星火出隔林
初上酒鐙紅

勛兒子振鎬

不願爾聰明惟願爾愚魯謹厚守一經拙以勤爲補好學期
有成少年事刻苦毋效杜季良輕薄譏畫虎

王

泰

字安伯仁利附貢候選員外郎著胥山草堂集

應寶時曰安伯爲心如先生長子承其先志夏施茶藥
冬施衣米兩世樂善如一日里中育嬰卹瘞施醫掩骼
諸善舉以至葺學宮增號舍凡任勞怨不少辭生平自
奉儉約獨好古書畫插架甚富畫師歐香館特饒神韻
嘗購葛嶺下邵遠平少詹小輞川舊址蒔花疊石相羊
其中題聯廳事云此地有崇山峻嶺茂林修竹終日惟
杜門蔬食經卷繩牀以摩詰語對右軍書按切王家事
眞天生玉台子也庚申杭郡戒嚴檄辦鄉團以意見不

合晨起詣天竺而城已陷全家付劫灰子身東渡辛酉再陷殉難

夏夜偕次白仲甫宿小輞川莊曉起有作

侵曉亂鳥嘯喚我涼夢覺披衣起開門風清遠香撲童頑睡
鼾齁客豪步超蹕沿隄忘路遙露溼足如濯小艇繫柳陰短
櫂手自握棹入萬荷中四面花爲幄折得蓮房歸初陽照屋
角

偕章次白朱睡庵夏松如游南屏訪松光上人登萬峯
山房樓復游雲林坐冷泉亭觀宋石門祇園圖朱竹
垞松靄山房六詠墨蹟同次白韻

欲造已公屋幽踐遲屢屢兼旬雨意濃積想妙雲樹霽色露
熹微山光足生趣殘梅猶有花寒峭春未暮

泉聲出山坳竹木互相掩一碧注澄潭晴光涵灩澦洗心活

水源真機流露漸梵響出空林斜陽鴉數點

歲庚子十月二十日方雲泉招同人集疏影庵看菊余
以俗事未赴翌日復出用何春渚徵君白華堂賞菊
歌見示和韻報之

藝花幽趣我獨知花開遞賞無閒時自課園丁善培護陰陽
燥溼惟其宜九秋益玩發叢菊佳種常聚千百枝方君風雅
有同好清芬世德守勿離不獨襄陽癖愛石

雲泉藏石甚夥能繩祖

武尤絕奇名翰寶祕猶可讀稱道夫豈阿所私黃雲絳雪各
珍重修短養以火色螳張筵讌客共欣賞我未踐約涎頗垂

翌日示以席閒句恍若坐對南山籬羣公詩好媿何遜我畫

未工深自疑

雲泉屬爲賞菊圖

願君雅好勿復移年年秋日植此淩

霜姿有酒招我我勿辭

三月二十三日招方雲泉章次白魏春塋集小輞川莊

看牡丹同用吳祭酒城南看牡丹九言體詩韻

寒溫變幻莫若三春天今年飛雪猶及清明前憶昨皋亭看
花兼看雪扁舟獨泛絕喜無喧闐更番花信俱較去歲晚鹿
韭結蕊僅見葉低懸穀雨已過風日始晴暖蓄久勃發愈覺
增穠鮮再展重三與客共幽賞招邀同過裏湖之湖邊或載
煙波畫舫結伴至或轉山徑筍輿來一肩以酒酌客客先讓
花飲花顏如醉天矯兀不眠屏開疊巘紅紫競綺麗金腰玉
腰倒映澄波圓天光澹拖花亦開正好和風微扇不放柳絮
顛羣賢盡是蘭亭敘中客都無韁鎖熱中深憂煎暢敘幽情
少長坐列次一觴一詠無俟陳管絃就中詩思方三拜最敏
雲泉詩
先成 蠻箋一幅袖裏出長篇從而和之各有絕妙句自此

清平調不讓青蓮花如解語應亦稱知遇偶然種植幸藉佳
章傳所惜未能襪被宿花下重城阻隔似覺道路偏對花與
客再三致丁屬花開加盛客其來明年

羅學源

字厚伯仁和貢生
議敘國子監典簿

杭郡詩三輯厚伯孝友仗義遠於經學尤精三角八綫
之術中年留意經濟深究醫術踵門乞診者無虛日庚
申賊至率團兵協守清波門城破巷戰刃傷十餘處歸
與母訣曰事無濟矣有諸弟奉母兒惟一死遂自沈繼
妻胡子裴同殉焉所著
有素問校義二十四卷

詠鷹和季傳四弟

學洙
韻

霜天鷺鳥盡縱橫越嶠閩疆寄此生掣鑕一呼邊馬動驕空
萬里海鵬驚寒催曉角騰逾上燒入秋原意未平何若上林
棲託穩翺翔氣概挾飛鳴

許光清

原名丙鶴字雲堂號心如
海甯歲貢著鵲湖吟草

府志光清少與弟光治齊名學政陳用光甚賞之詩宗鮑明遠李供奉駢文亦近義山工篆隸每論說文解字

頗多創獲

汪曰楨傳略君父居鄉多陰德君少與弟光治齊名先

後游庠序詩宗明遠太白兼及飛卿義山駢儷亦近義

山所著鵲湖吟草其至者也唯著有法帖辨正瓦當

傳錄間有遺留皆其不欲以理學名而禮法自持孝親

之問難如響斯應又兼通醫術及卜筮諸雜藝余自

友弟人無閒言明天文兼通醫術及卜筮諸雜藝余自

愧不識星象君引余露立廣庭中一一以指按余背摹

星形而口述其名瞭如也子仁杰力學勵行有父風賢

書既登聲香籍甚意者天既既其身將有以昌其後乎

亦差足慰君於九原矣

哭應和曰心如茂才承尚書太常太史諸公之後家學

淵源篤志勵行枕經菲史兼擅詩文與同懷弟羹梅自

相師友早負才名今世之機雲軾轍也黃涪翁詩云家世到今宜有後士才如此豈無時可以轉贈緝雅堂詩話云伯廣文勛苦端謹不媿門風此次編詩爲其比哲嗣王伯廣文勛苦端謹不媿門風此次編詩爲余搜采至一千餘家其勤至是剛木所許非響詞也

張烈婦詩汪謝城寄徵

烈婦皇甫氏桐鄉諸生小洲鑒女歸歸安諸生張槎仙模槎仙

歿氏絕粒殉之

離離雲中雁飛鳴終不離一朝中道折比翼羈雌萬死相追
隨五湖之南有賢婦說禮敦詩共相守早將儼日矢丹心長
願春風偕白首何期待疾疾不康勺飲粒食安能嘗君魂未
斷妾腸斷有口那更甘膏粱阿儺連理枝交柯不獨生東枝
既已折西枝甯復榮古來張郎傳畫眉閨房兒女徒燕私祇
今大義炳倫紀千秋誰勒韓陵碑

題蔣生沐

光煦

虎阜餞春圖

婪尾花前一尊酒子規嘯徧蘇臺柳留春不得餞春歸青帘
畫舫琵琶手七里橫塘水似煙冶游時節峭寒天東風吹過
笙歌石無數殘紅點客筵

岳忠武王玉印歌王硯農

之佐徵題

印闊一寸高九分覆鈕上壓蟠螭紋玉質黝然蒼且潤以朱
爲地白作文姓名兩字岳忠武篆法飛翔兼渾古劫火沈淪
不計年當時曾沒湘江渚漁人網得深咨嗟展轉歸入徵君
家一時詠歌編成集勝事競聽名流誇於庠荆山璞李斯璽
大寶湮沒今已矣何如此印長留天地間斗牛看射虹光起
碧雲寺

亂石孤峰壓寒莎一徑緣泉深留勝迹洞古稱枯禪白雪發
高唱碧雲空暮天相期結吟社煨芋送殘年

送秋

西風底事促征輪屈指迎涼過九旬話別空階蟲絮語抱香
寒蕊蝶傷神清砧杳杳催離思落木蕭蕭逐去塵欲薦金莖

一杯露霜華凝白感淒辰

驪歌一曲託賓鴻聽入寒煙暮雨中遮斷征塵雲捲白壯來
行色葉添紅長亭衰草難留馬南浦荒蘆不繫篷團扇無情
拋未久轉憐離合太恩恩

送友

黃山卅二金芙蓉四千餘仞高巖嶽軒轅皇帝合丹處尙傳
浮邱容城峰曹溪阮溪互迴注由來勝地仙靈鍾高人探陟
發高興擬向雲外飛孤筇況是清秋氣蕭爽林岫洗出無塵
容翩然買楫渡江去新安溪上浮鳥篷招邀更得賢地主堂
開信古羅鼎鐘錦題寶刻充祕翫法書名繪陳清供自攜竹
笈亦精絕千文一卷蟠蚪龍長沙老人應宿世墨花聚作奇
香濃我曾縱眼探法藏坐臥唐宋躋義農定知到山及霜菊

三衣入座欣相逢便應行腳到絕頂盪滌雲海開心胸峰頭
奇石自接引更與麋鹿爭幽蹤山前人家守耕鑿不知江海
連煙烽安居樂業深足羨移家那得來相從側身西望發遐
思長霄但見浮雲重歲寒時節儻遙憶爲我卻寄黃山松

題汪謝城詩集

懽愉辭難工詩工多在窮古人雖有言要由遇不同我懷昔
湮鬱讀書君見疑君情今感慨乃於詩見之交游其推服題
語致稱揚豈不能附益知非君所望詩本道性情可以當晤
言書來有此語我亦以爲然君意探絕學不苟事詞章經術
旣快奧推步復求詳而我慵且拙百棄百不成一語還詢君
何執以成名

許光治

字羹梅號龍
華海甯廩生

府志光治於說文考證之學最精尤留

心金石款識有校正金石粹編八卷

管庭芬傳略君生平實事求是於說文攷證最精故篆

隸俱不落晉唐習氣而辨金石款識釋文訂譌悉皆中

肯綮則對物寫生於花鳥極工不師古法獨自成家賞

鑑者以南沙相國比之所著江山風月譜詞曲二卷有

聲畫一卷已刊入蔣氏別下齋叢書外有放吟六卷紅

蟬香館駢散體文四卷未梓生平靜默寡言口不談人

過然至評論經史則侃侃不稍遜

東湖叢記龍華生平積學旁及書畫篆刻靡不精妙辨

別金石如犀燭水卒年僅四十有八余搜得其手定詞

稿付梓借詩文各體散佚大半擬編輯而未竟也

蔣母徐太安人節孝詩

吳江歲貢宗暘女
監生星緯繼妻

湘竹裂寒老鴉語淚壺飛天作靈雨筵簞下招期箴子驚鳥

啞啞集神羽懿哉母節冰潔渠淑貞靈粹垂世宇蔣侯之匹

徐穉女

寒甚不得事筆墨疊韻排悶並懷費曉樓

丹旭

窮年急景短晷促春意將回尙潛伏北風一夜天上來
籬頭吹斷續煨薪煖不到爐耳插花凍已堅瓶腹消寒
圖正數四九故諺有徵徵俚俗舊家豪侈試椒酒學士
清寒劃齋粥冬心落落抱水仙秋實離離綻天燭芸齋
聊與共岑寂筆墨冰膠稱休沐兩山殘雪欲消盡何處
風光可留矚此時卻憶費山人未必調鉛寫青綠祇應
名士供清談忍學枯禪長閉目

武林歸舟作

揮手出城去征橈下曉川雲吞半湖日風掃一林煙
溽暑已消卻輕涼殊洒然前溪有雷雨今夜足高眠

登天甯寺浮屠

鼓健登臨日未斜憑高放眼極天涯微茫雲海三千里稠疊

春城十萬家煙外樓臺空草木雨餘田里徧桑麻游人細話
昇平事香火村村樂歲華

霜月

霜花飛度闌干曲皓月斜空寒似玉一片清輝冷欲流樹影
參差漾重綠層霄淡淡浮雲孤冰痕皎潔凝天衢小星明滅
大星散枝頭啞啞鳴驚鳥

擬古爲趙貞媛作

春風楊白花辭條滿江水隨波生浮萍從葉漂根幾千里韶
光一霎數變遷物性飄零有如此人生懷舊應有心故舊恩
深情亦深如何錦江水空寄白頭吟男兒意氣固不久茂陵
亦似琴心否好新正是同心人安見死生不相負一字終身
期白首君不見趙家婦

春日游涉園三首

聞說名園峙古城，尋幽天與放新晴。
無邊草色皆春色，不盡松聲作雨聲。
行到清溪花自落，穿殘修竹鳥空驚。
樸巢過去無人到，十二闌干畫自橫。

自笑尋春十日遲，綠酣紅褪惜芳菲。
古牆雨暗螺丁蝕，淺徑泥融燕子飛。
芳草多情縈柳絮，野花無主臥苔衣。
子規林外休啼，曉徧莫使游人作意歸。

渡水登山兩屐忙，薄晴天氣稱尋芳。
雨餘碧漲澹無色，風過綠陰微有香。
亞徑亂紅依古樹，繚垣深翠出修篁。
石橋前去多幽境，且約重來破日長。

曹錦堂

字杏庭，海甯廩生。

許淮祥曰：杏庭，丈家貧，劬學，善書，工詩，道光丙午，吾州校官錢警石廣文纂修海昌備志，丈與分輯之列，采訪

勤勸校對精詳蓋篤行士也性好善敦仁堂喪會嘉慶
八年創之後病地不足丈捐地三畝有奇事載備志采
訪日記咸豐辛酉粵寇竄擾辟居
東北鄉二載著瑣尾吟二卷未梓

義井歌

海昌學廨大門內義井一口已見嘉靖蔡志不
詳何人所鑿警石學師審其石闌若有字蹟情

大舟上人拓為墨本文雖模糊姓名約略可辨識為
本邑奉佛弟子許瀄薦其妻胡氏七十二娘子往
生淨土而開惜紀年已闕未知為何時人道光乙巳
七月同人襄修州乘於忽逢林學師出觀拓本屬各

詩題

修綆汲古甘泉師井銘椎拓招禪緇義泉分明二大字旁有
八行以紀事奉佛弟子存姓氏想見許瀄力開此許瀄許瀄
爾何人去官學圃非其倫薦以兼解萬戶渴誠心一片深千
尺往生淨土是耶非觸我舊事重歔歔當年提甕杳無迹一
琰寒泉薦何益覩此增人伉儷情豔他夫婦齊傳名亟濡殘
墨補入邑乘後俾人與井同不朽

感賦

薇采西山愧義人眼看被髮當文身醫瘡竟爾甘剜肉嘗膽
何堪又臥薪咄咄書空奚補事茫茫大造孰爲鄰桃花源縱
非塵世流水無情嬾問津

浪擲年華六十秋近來蹤迹等浮漚居從何處始容膝窮到
者番應盡頭懊惱時維思寡過牢騷語亦怕招尤所欣吟侶
關心甚勸借新詩樂唱酬

張

濤字鐵庵
海甯人

查世禮序略鐵庵當今博雅君子於書無不讀隱於市
廛雖甚囂塵上而吟詠不輟不獨工詩且殫心於古文
寓樓一角悉爲頓書之倉人定後篝鐙披閱偶有會
心達旦忘倦如齊王之食鹽津津有味其篤嗜如此

登尖山

一路尋秋色行行上翠微僧隨雲樹沒鳥背夕陽飛石欲煙

中墜帆疑天外歸朔風吹海立花雨忽霑衣

歲暮志感

夢雨闌珊寄所思狂吟故作不情癡
依人深恐三彈缺處世
休論一局碁紙上功名蛇畫足
篋中箸述豹留皮西風畢竟欺
年少吹損朱顏換鬢絲

謁元萬戶馬公有禎墓

峩峩三尺枕巖阿憑弔前賢感慨多
痛念天廚空鼠雀傷心
故國正干戈公運糧至直沽爲寇阻不得進
無煩北闕徵賢詔已續西山采
薇歌明祖登極以禮徵召
兩字遺臣題墓碣精靈千載總難磨

磨

公臨沒屬題墓碣曰故元遺臣

王其瀾

字觀泉嘉善諸生

家傳略其瀾性方直耽吟詠咸豐十年罵賊不屈死

城樓

東風扶我上高樓十里春光一望收
細雨輕煙偏淡蕩落花飛絮自沈浮
簷前好鳥窺人語天際孤帆逐水流
幾處紙鳶飄彩綫兒童也欲挽春留

謝澧蘭

字瘦仙海鹽人著庚寅草

吳應和序略瘦仙幼貧不克從師稍長乃知向學夜發
逆旅主人插架藏書讀之恆達旦尤好史漢通鑑綱目
諸書既而讀漢魏六朝三唐詩始學作韻語學有根柢
故其辭氣雄健近岑嘉州李東川而不落空響嘗游齊
魯燕趙登臨弔古之作一時知名上咸擊節嘆賞忽念
親老束裝南歸鄉黨後進袖詩請業者屢滿戶外周旋
一室自
有樂境

書王軫石先生宋遺民廣錄序後

白雁一聲天水碧從此江山無半壁
風卷厓山萬丈濤孤兒孤臣同漂溺
丞相斷脰柴市以參軍晞髮西臺泣
赴難賴有

諸君子瘞骨納館忠義矢一孟麥飯哭冬青惜無姓氏光青
史幸遇程篁墩編成遺民錄殘篇斷簡尙含悲夜雨淒風不
忍讀吁嗟乎埋迹商山歌采芝逃名栗里飢餐菊無限傷心
一序中春鐙燕子已成空先生閱盡滄桑變禾黍離離異代
同

初夏晚晴祝南筠丈

德輿

招同吳榕翁

應和

顧半村升

詰小飲分韻得晴字

薄暮柴門望悠悠眾緣生花飛幽境晚翠滴一峯晴疏雨斜
陽隔殘虹古渡橫今宵無限好坐月聽溪聲

陳

錦

宇蘆雪號板橋平湖恩貢著蘭芳堂集

縣志錦性豪邁不羈工詩與黃金臺莊散齊名時稱蘆川三異人晚年崎嶇兵間以耿介不苟餓死許仁杰曰于源登窗瑣語云板橋東方三異人之一也三人余識其一一爲姚君鐵生嘗從軍有功授武職以

酒失事幾獲罪跟蹌萬里徒步而歸後補學官弟子一
爲某亦諸生家故饒人見其衣藍襖如丐不與世接不
知其中何如板橋刻有蘭芳堂集詩
和平無可異者其言與縣志不合

陸魯望故居

道親物自疎真隱離塵俗言尋甫里居泉石殊清馥笠澤有
叢書松陵遺畫幅高臥樂煙霞可耕亦可讀斯人去已遠槩
澗留芳躅茅茨近水幽竹樹當階綠斜日滿荒庭何人薦杞
菊

春日田家

遠山當屋角晴日啟柴門菜甲綠齊埜桃花紅滿村舊巢來
燕子新雨長龍孫鄰曲時相過桑麻喜共論

秋夜聞蛩

銀漢橫斜碧宇清牆陰唧唧起蛩聲秋高旅館寒初覺歲暮

空堂夢易驚掩卷窗前人獨坐挑鐙簾外月微明夜深靜讀
廬陵賦一種推遷感物情

葛嶺

山光蕭瑟水微茫蔓草荒煙易夕陽一櫂秋聲聽不得淒涼
閒話半閒堂

朱善張

字子弓號山泉平湖諸生官淮徐揚海道贈都察院右都御史著月潭書屋詩鈔

錢振倫撰墓志公早孤善事母友教其弟以諸生率義
旅守鄉里起家南河通判進裏河同知擢淮揚道未幾
改并爲淮徐揚海道時揚城再陷髮逆陷天長撲蔣壩
公馳往拒之殲其酋

賞巴

圖魯名號異數也洊任徐州用堅壁清野法徐方
以安公內行肫篤善屬文前後校刊家集甚夥

守陴示諸將吏

朔風夜氣森刁斗聲淒寂狂氛不易摧相持在咫尺丈夫志
四方何爲畏鋒鏑此郡三燹餘殘黎未歸籍有志尙招徠鄰

境又傳檄激之以忠義能使頑者格上下咸一心致力或當
百三旬賊未去辛苦忘晨夕雁陣忽驚寒漫漫霜月白劍氣
冲牛斗鼓聲震山澤兵法戒輕進我長在堅壁久困氣自衰
以逸逞搏擊古者名將材要在審主客我來幾一年差幸減
徭役無術起瘡痍滿眼痛兵革媿負

簡畀深尸素未譴謫所冀同袍人補過能求益先事念此離
撫時尤惕惕

李吟橋

平湖人

張湘任序略往歲予甥屈子素作道善錄載李傭養母
一事云以所得悉供甘旨而自食則長齋脫粟其後李
敗事子從妹婿高芝亭予始見之其貌朴誠其言訥如
不出居數年母死李哀毀骨立晝則來芝亭家勤於所
事夜歸坐臥不離母柩側發聲一慟宿鳥驚飛聞其聲
者咸噴噴稱曰孝子孝子性又嗜詩嘗有句云危橋倚
古木芝亭亟賞之
爲署其字曰吟橋

聞砧

孤館客無寐良宵到處砧故園惟木落旅夜報秋深韻切三更月聲寒一片心燈殘聽未已嘆息助愁吟

楊

璵

字雨莼平湖人
善晚香居吟稿

白嶽庵詩話雨莼家貧少孤營什一之利以養母嗜吟詠至老不倦如風霜遊子面冰雪故人心把盞讀秋水橫琴鳴夕曛蚊國曉驚雷軸轉蜃樓晴擁日光寒雞鳴野店月初落人立柁樓霜未消爲同里俞芷衫沈浪仙兩君所擊節

夜過乳溪

中夜理孤櫂怱怱過乳溪冰衝船腹響雪壓樹頭低歸思亂流急行蹤歧路迷將軍當此夕好去破淮西

時夷警未靖

徐

詰

字逸帆平湖人
善春暉堂文集

白嶽庵詩話逸帆枕荈經史文名藉甚仰屋箸書布衣終老同里馬孝廉承昭云徐氏爲吾鄉箸姓二百年來

取科第者相接武昔逸帆舍舉業攻古文辭族
之人有嫻笑之者由今觀之果孰得而孰失耶

客途遇舊友

覲面不相識誰知是故人容顏驚已換姓氏待重陳身老看
君健年荒非我貧平生慷慨意不用淚霑巾

陳文藻

字愚泉平湖人
箸鏡池樓詩鈔

縣志文藻少孤流寓乍川業櫛工以養母弱冠始爲詩
得伊杓指授遂益工何司馬太青深重之而性傲岸卒
以貧死

許仁杰曰愚泉乍浦人沈君浪仙刊其詩行
世兵後版片無存海鹽徐君古春重爲付梓

陳山積翠軒聽方子春彈琴

顏陽下巖谷夕翠浮窗紙湖上素心人開軒撫綠綺泠泠手
一揮萬壑風生指黃葉墮空山幽禽棲復起月華松際明餘
響流澗底四座寂無喧機心靜如水

審山

一塔湧孤峯嵐光帶雨濃仙留丹藥井僧飯碧雲鐘片石埋
荒草千秋說祖龍翠華遊幸後喬木是秦封

過朱雅山先生故居

溪頭黃葉冷茅茨腸斷西州泣故知暮雨荒籬三徑草秋風
破屋一瓢詩逃名有志才偏著干祿無心數任奇歎息衡門
幾株柳蕭條那復舊時枝

蘇臺懷古

昔年歌舞地今日水空流舊苑鶯花晚荒臺草木秋誰知傾
國貌能解戴天讐不盡興山意含情一駐舟

題沈節母詩後

秋林葉落風淒淒霜冷城頭烏夜啼烏啼慘切不能寐終夜

聽鳥徹流淚烏烏烏嗚何苦下有孤兒失恃怙繞墓惟聞
風木哀趨庭那復斑衣舞念昔生孩纔六月吁嗟慈父忽云
沒母守空閨不憚勞質衣賣繡供姑食我今聽鳥心悲悼爾
能返哺眞純孝可憐多少爲人子欲報劬勞親已死

張嘉鈺

字采言平湖人
著晚香居詩稿

松江夜泊

木葉下蕭蕭空江泊短橈平沙連斷岸明月湧秋潮孤客未
安枕美人何處簫故鄉在咫尺歸夢奈迢迢

嚴章福

字秋樵歸
安廩生

許莊祥曰秋樵丈爲鐵橋先生從弟治說文與先府君
交善工小篆嘗以自書千字文眎府君爲糾正其俗字
箸有說文校議議三十卷經典通用攷十四卷五音類
聚十卷聞見異錄兩卷近許齋雜箸兩卷彙藏於家

節婦篇

瑩瑩澗底冰皎皎山頭雪冰有時而消雪有時而釋不釋亦
不消磷磷厲婦節節婦陳氏女嫁爲嚴氏室鳳皇集喬林鴛
鴦戢左翼新婦拜堂前其舅先姑沒事姑與祖姑小心循婦
職荒雞一再鳴低挽靈蛇髻洗手奉羹湯服勞盡纖屑慎從
當時戒家人咸嘖嘖結褵甫十年育子慶彌月喜氣溢門閭
夫君忽遘疾湯藥兩旬餘吁嗟不我活煢煢未亾人時年二
十七觀者爲流涕聞者爲太息一死何足難奈此呱呱泣祖
姑八十九姑年六十一兩兩白頭人依依不忍別飲恨而吞
聲總幃坐蕭瑟裙布與荆釵日夜勤紡織先意侍重闈撫兒
計成立有子稱克家繫惟母氏力嘉慶癸酉年行年已六十
綽楔光門楣貞名列簡策半生茶苦來

恩榮不易得道光己丑年四月廿一日七十六春秋考終全

閻德迹往澤長留身死名不滅埋骨道場山夫君此同穴丙
舍守丁男高文表墓碣勁柏列森森喬松蔭鬱鬱松柏有本
心煥寒無改色側聞未笄時厥父病且革刲股療父病病根
一朝掘又聞父授田堅辭不苟獲節與孝慈兼四德無一缺
次孫名錫疇徵詩文彙刻殉陳夙見聞以爲列女式

沈文藻

號春泉歸安諸生
著依綠園吟草

過榆蔭樓晤倪米樓

稻孫

卽送之晟舍省墓

忠介聲名大

米樓本凌
忠介後裔

朝衫血淚斑斯人不可作遊子故鄉

還鶴骨支離甚牛眠想像閒明當親拜墓松雨落潛潛

許晉達

字雲翔號揖青歸安廩生
著揖青山莊詩鈔八卷

縣志晉達性嗜吟詠規模劍南如夔州旅夜云更析嚴
關靜星河永夜寒舟次云風塵磨壯思雨雪滯歸舟贈
友云馬足踏殘燕市月笛聲吹老玉關秋皆可誦嘗輯
雙林詩徵若干卷廣搜博採彙爲一編亦詩家掌故也

殉庚申難
士林惜之

閒遣

晚向春陌行行行
忘歸路隔林水涓涓
隱約遮野渡欲濟苦
無航臨流且沿沂
鐘聲何處來冷然波心度
不愁雲境深但惜夕陽暮
去矣復徘徊還恐重來誤
遙望野人家炊煙靄如霧

初夏

吟身慣住水雲鄉
繞屋清陰夢亦涼
雨後窗明山入畫
風前簾捲燕含香
檐花礙帽紅低戶
鄰竹窺人綠過牆
待晚更思移酒舫
一篷明月泛蓮塘

春日漫興

槐樹陰陰繞敝廬
荒村寂寞意何如
瓶添暖水尋花供
榻避

香泥讓燕居賢聖閒評新製酒丹黃細校舊鈔書幽吟自愜
疏慵性莫問門前長者車

落花

子規嘯破綠楊煙片片飛花落舞筵三月繁華春草草五更
風雨恨絲絲漢皋有客悲遺佩蜀道無人泣委鉏聞道碧桃
天上種棲煙傍露自年年

自錢塘至蘭谿舟中雜詠

一江明月水潏潏何處清歌按小鬟我正鄉心拋未得琵琶
偏唱念家山

泊棹沙隄近翠巒獨登山寺笑憑闌帆檣如蟻江濤惡儘有
閒人局外觀

許旦復

字曙卿號海樵歸安諸
生著夢紅閒館詩稿

府志旦復簡于友誼視人事如已事任勞任怨無自矜色家貧時或斷炊而鈔書不輟故友遺文搜羅最多箸有冬心廬文鈔

夜思二首

每事逢張角天教拂所行古來皆有死臣亦厭餘生勞我因多累依人爲底情歸休莊列旨達此是長月

入世多憂患途窮畢此行人求仙不死我愛佛無生鬱鬱平時志寥寥此日情宵深還獨醒一炷懺長明

倪梅生

字董軒歸安諸生
箸董軒憶存艸

碧浪湖櫂歌

水簇菰蒲兩岸平錦塘十里櫂歌聲儂家西塞山前住不賣鱸魚不進城

陳

蔡

字芝山鄞貢生
官天台訓導

華頂峯觀日出

華頂峯頭遊信宿飽看層巒意未足閒雲如絮滿幽局護住
千閒萬閒屋百八蒲牢夜氣清起視遙天星月明銀河耿耿
落窗牖眾山如夢都未醒倏爾前峯明復滅一綫光紅漏腥
血怒潮頃刻挾山來光怪陸離耀天闕習聞九州崇五岳天
台東南祇一角西連雁宕東四明天姥之峯相犄犄我今遊
覽適清興歸路犖確緣薜徑仰觀石壁手可攀俯瞰溪流心
不競置身如在蓬萊島手弄白雲天下曉黃精厯雪經千年
虬蟠藤杖鹿銜草如此仙方不易求歸來何處尋丹邱下山
一萬八千丈回首雲封黃葉樓

陶慶禾

字靜軒會稽人慶仍弟官安徽當塗
典史殉難卹贈六品銜祀昭忠祠

家傳略公善章奏工楷書宦游皖省咸豐初補當塗尉
皖撫蔣公文慶徵司文案癸丑正月安慶陷蔣公死公

亦被三刃題詩
二章投井以殉

絕命詩二首

借箸慚無退賊方節
轅知遇受恩長敢云下吏無官守到此
城人不與人

孤兒寡婦仗吾兄
東望家山淚暗傾
爲語老親休慟我
劬勞報答矢來生

呂遵賢

字射圃餘姚歲貢候選訓導著課餘詩草

施繼常曰射圃師上溯遠祖至十九世一脈相承皆補博士弟子員里黨傳爲佳話師幼承庭訓年十六與邵先生百齡同歲遊庠有神童之目顧終身未遇年七卜猶資館穀有句云可笑先生不值錢老來依舊坐青氈亦可見其境遇之窮矣然處之泰然未嘗一日累其心著有中庸匯解周禮約編

贈葉杏觀先生

效

才藻權奇眼共青
息園遊轍記曾停
籀書摹古通神
悟畫筆

消閒見性靈瀟灑胸襟能遠俗和平心氣自延齡今歲辦香七十

喜有文孫繼笑看藤花蔭滿庭君家息園有紫藤

車

林字雲表號梅隱上虞諸生著梅隱詩鈔三卷詠史詩二卷

夏聖功序略君博涉墳籍留心古今治亂之迹爲文俊美有風骨詩三卷平生蹤迹略具其中鏗之者其門人宋梁宋棠陸源非君意也

登觀音巖

尋壑經邱到此峰峰頭吟眺久
揅筇雲形變幻成蒼狗江勢
蜿蜒走白龍蔣帝荒祠殘燒入
蕭郎廢壘怒濤衝由來興廢
無窮事博得僧樓幾杵鐘

宿沙澗驛聞雨

羈客憎長夜牀頭酒已空
夢殘燈影裏秋碎雨聲中
壞壁容飢鼠頽雲阻斷鴻
那堪泥滑遶明日掉鞭東

周 永

號樂庭嵎人著
有新月樓詩

次蔡霞舟先生題亦樂軒原韻

此軒吾獨樂朋亦遠來遊地僻緇塵隔庭空展印留讀書期
有用問世孰無憂願學安貧者陶然閉戶修

茹贊元

初名芸號襄廷嵎諸
生著古今體詩存

縣志贊元幼失怙孝事節母行推鄉里熟掌
故分纂道光嵎志工詩能書尤善擘窠大字
阮福昌傳略先生周歲能識字比長益嚮學以家貧為
童子師事節母孝夜傭書數千字以易米甘旨無缺母
病逾年奉湯藥滌滌屏調劑漿鬻無一日閒有
友客死無嗣走二千里迎輓歸葬著修志贖言

仙巖夜泊

落日映寒流仙巖住客舟嵐深千嶂暗風緊一江秋節序逢
黃葉行蹤等白鷗明朝挂帆去蕭瑟使人愁

蝶

羅裙化出換銖衣
豔逸輕盈是也非
五色迷藏窺瘦影
三春遊戲趁晴暉
賣花聲至迎香舞
踏翠人歸逐隊飛
莫向東園依苜蓿
江南風景正芳菲

鄭心水

號石頭巖諸生
箸夢中吟一卷

巖詩鈔石頭工書
善畫嗜古成癖

齋中偶作

蟋蟀壁間鳴如與幽人語
庭樹漸蕭疎涼風吹何許
相彼芙蓉花清香凝淺渚
蘿徑闌無人抱琴獨延佇

蠡城逢裘新洲有贈

去年相逢寒食節
棠梨花開白如雪
今年寒食重相逢
細雨斜風足愁絕
橋邊酒家新漉醅
畫船簫鼓錦帆開
上樓高擊鐵如意共道先生歸去來

錢

釗號青垣曠附貢
箸青垣遺藁

錢憲燦曰先曾王父性耽吟詠中歲
泛覽諸家力追風雅義行詳邑志

晚行北山卽事

一路踏殘葉夕陽紅半山寒風吹古木澗水下前灣倦鳥飛
初定孤樵去復還欲投贊公宿門掩白雲閒

朱劭英

字鏡蓉仙
居諸生

山居感事

北望銷魂極西來說法尊深山幾歲月一榻老田園未得逢
僧話惟期辟世存無心計衣食亭午不開門

胡鳳丹

字月樵永康諸生署湖北
糧儲道著退補齋詩文存

家傳略公以知府留鄂司釐局裁革陋規筦崇文書局
權督糧道雪毛守戎以民欠被誣之冤豁免地丁民需
實惠歸田後築十萬卷樓嘯詠其中蒐采先賢著述爲
金華叢書編小志刊詩錄并輯續錄有聞見錄鄉賢錄

待梓性好施與睦族周貧凡善舉率以身先重建培文
義塾助增義田倡捐崇功書院膏獎尤篤友誼貧不能
歸葬者不吝麥舟之助三奉

特旨建坊旌門

孫衣言序略月樵以駕部郎居京師有幹才子謂他日
當爲能吏而未知其工詩及至武昌與何伯英張鹿仙

林穎叔友善益專力爲詩

予又歎月樵善自變化

張之洞序略君於諸體尤多

豐韻再接逾厲累丸不墜

緝雅堂詩話月樵于鄉邦先輩遺書表章最力昔之婺

學漸卽湮沈倘有人焉爲之發明義蘊主持名教往往哲

流風可以復振閱君叢刻彌用跂望君既歿余挽以聯

云藏書十萬卷下筆數千言小試經綸便從漢水投簪

遺績待編循吏傳使浙及三年見君才一面相逢老

病劇憶婺州分襁褓行錄贈郡人詩蓋深惜之也

塞下曲

塞下衰草何萋萋有地不得施耕犁塞上健兒好身手自言
殺人如割雞征役年年無休息何時破虜靖鼓鼙天子北登
單于臺萬里頻聞胡馬嘶胡馬嘶未已撲面塵沙起開邊日

耗千黃金中國荒田滿荆杞

讀韓昌黎集

昌黎先生唐巨儒力崇正學鋤浮屠原道原性濡大筆遙遙
八代衰能扶頑廉懦立聞風起迴瀾屹作中流砥浩氣彌綸
天地閒孟子而後一人耳上書伏闕龍鱗撓諫迎佛骨天爲
驚臣罪當誅主明聖一官遠謫潮陽行朝登九嶷山夕渡湘
江水藍關雪擁路千盤秦嶺雲橫家萬里孤忠耿耿通穹蒼
齒搖髮童神明強惟德格天誠格物一紙驅鱷如驅羊平生
直筆多遭忌太息樂安空獻媚突兀淮西十丈碑口沫手脂
好文字五百年來吾道昌千秋俎豆流馨香援佛歸儒一髮
繫誰其繼者朱紫陽

溪春行

紅泉汨汨飛青峯溪邊雲碓朝昏舂杵聲斷續入空際雲影
水影都溶溶探源尋響步幽徑行迹依稀人罕逢惟留雞犬
守茆屋稻粱已足三冬供雨後月明絕澗底溪流寂寂寒雲
封風輪激水隨軸轉岸花朵朵青芙蓉歸來策杖碧煙繞一
聲飛度前溪鐘

兗州道中

席帽塵衫赴

帝都霜橋茅店渺征途山形北折羊腸細秋色西來雁影孤
岸柳嘶風盤駟馬蘆灘日暝聽嘯鳥絃歌比戶懷鄒魯猶有
流風似昔無

樊貴賢

字賢峯常山歲貢
著立誠齋詩稿

縣志貴賢殉髮匪
難給雲騎尉世職

兩浙輶軒續錄

卷四十一

樊貴賢

畫

賢良峯懷古

在三衢山前宋王介讀書其下撰賢良第一因名南渡後丞相文懿公隱於此

名山如高賢名酒如清聖君看賢良山卓立一峯正巋然出
雲表蘊蓄君子性巍巍中甫公先我此吟詠鯁語削山骨千
載心相印流芳今未沫溪石潤且淨天地誕清氣草土倍堅
勁登臨想前輩模範得先進舉杯問青山青山默不應猶有
舊時月清風灑芳徑

顧山歌

噫吁嘻顧山之山何峻奇嵯岈屹立險以巖大山小山還相
顧神工鬼斧擘屨屨仄徑縈紆入翠微歸然疊嶂青琉璃巉
巖去天不盈尺羣岫連絡何參差一峯矗上聳螺髻一峯橫
落修蛾眉山山盤鬱勢基錯東峽西峽雲迷離橫空絕壁可
望不可卽蒼然青松碧樹紛晴霏上有千年不死之靈藥下

有萬年倒挂之枯枝黃鵠西飛莫能度秦皇欲鞭仍游移怪
石崎嶇鳥道逶迤春淡淡兮欲雨雲變變兮生衣吾欲振衣
絕頂一搔首但見大地蒼茫天宇低睨宇宙之茫茫弔今古
而長噫古人不我見逝者竟如斯去日之日云已非來日之
日猶可追嘯歌兮夷猶俯仰兮徘徊帝鄉不可期招鶴兮歸
來羲爲御兮風爲馬我欲乘之兮雲中馳明月送我兮江之
湄江湄何清淺飛鴻漸羽儀別君去兮度崔嵬思美人兮天
一涯側身迴望空惆悵落霞縹緲天際飛噫吁嘻顧山之山
何峻奇有山如此胡不歸

九日登大觀樓詠懷

眾綠陰陰扶一樓曉煙點點認孤舟天圍大野星辰動地帶
長江今古流佳節又逢重九日故園負了幾回秋拂衣欲向

青天問翠袖佳人漸白頭

張豫翹

字桐齋桐廬歲貢殉難卹贈教諭著壽補山房稿

留春舫

喚起曉鐘聲莫遣春歸去吹落萬桃花花飛向何處

修篁風榭

危石倚寒玉長風引曲廊惟留撫琴客一曲綠陰涼

袁世緯

字箕邨桐廬貢生

浙江忠義錄世緯與同里胡燕俱以文字有聲於時嘗結茆坪詩社咸豐十一年冬燕糾鄉民捍賊被刃世緯亦爲賊擄懷刃訪殺燕者欲爲復讐輾轉至湖州黃鵠事覺被焚死

緝雅堂詩話咸同之間浙中多死事君子遺詩流傳咸所搜錄藉據懷忠之念用符采風之義今覽箕邨先生事略臨難不苟敬其爲人詩亦瘦硬蒼秀肖乎其兄不婉二妙之目

和友人山居雜興

莫笑曾棲芳谷客山居樂事未躬親白雲源口浮槎去欲叩
元英與卜鄰

燒畬無稅闢奇荒休怕官租不易償山澤雖稱爲國寶未聞
加派議宏羊

樹上雞鳴屋在巔春奴汲婢亦翛然白雲就我檐間宿始覺
身居第二天

深巷人歸犬夜噪千年枸杞釀春醪何須拔宅俱仙去枕石
浮杯亦自豪

材全恥作飯牛歌知住深山意氣和亦有奇書通活國野心
未肯逐雲羅

布穀催人不住鳴山多田少肯深耕西成有日應秋賽爲備
迎神篚入城

試攜弟妹采名山但乞樵風便往還
儻遇神仙無別願心平自覺遠塵寰

莫道山人喜入城麀麀偶傍陌頭行
西巖欲逐漁翁宿不使移文惹鶴驚

江枕

晚臥何曾穩江樓秋意生
鐙青飢鼠出月落亂蟲鳴
萬事濁流去孤舟頽岸橫
枕函藏古劍應悉此時情

王國佩

字維玉號璞翁遂安諸生著平心莊詩文集

初夏沙護庵寄洪遠艇

山深竟日無塵事靜掩雙扉長綠苔
一徑竹陰閒領鶴半牀花氣夕銜杯
虛龕拂石如重約小洞餐霞弟幾回
寄語武林溪上客相期邀月夢瑤臺

余炳虎

字風樵遂安人官四川興文知縣

讀吳小山先生全孝傳

延陵舊雨慨當年懿行今爲令子傳作室爭誇堂構志吟詩
新廢蓼莪篇枌榆有色通仁里霜露無聲冷孝泉從此揚輝
貞石起峯青江上眺悠然

葉楚材

字湘民平陽諸生
著養根齋小纂

吳承志曰楚材爲嘉榆族子父茂勳亦好爲樸句閒涉
生澀自楚材師華文漪始講求研鍊所爲詩頗風流醞
藉

花下曲

東風吹春春有聲碧紗窗外聞嘯鶯曉霧溼花花無力曲檻
雕闌扶不得美人花下搗銀箏芳心脈脈含隱情玉顏自愛
如花好韶華恐向花前老東家西家花欲稀癡蜂浪蝶何處

飛

望孤嶼

空水浸青山波中卷霧鬟人聲喧野渡落照護禪關古木長
風勁平沙白鳥閒此心隨目遠塏影翠微閒

尋錢王樓故址

王氣曾傳應斗牛當年一宿有高樓懷才漫集三千客論霸
纔安十四州鐵塏荒煙沈夜月錦城蔓草入清秋六陵消息
無人問同是滄江急暮流

翁秉榮

字華賢壽昌
恩貢

桐君廟

釣臺東去到桐廬曾說桐君此卜居古木蒼茫遺廟外行人
指點落帆餘逃名卻笑披裘客濟世猶傳種藥書江上往來

憑弔者可曾逸事問樵漁

余

銑

字潤臣慶元恩貢

縣志銑性嗜學博通經籍協纂志乘多所參校士林重之

萬松庵

萬松環繞映禪宮涼影森森滿院空
欲識遺蹤何處是片雲孤月有無中

柳應池

字墨泉雲和歲貢箸華園吟艸

遊天正庵

策杖試幽尋山空靜客心片雲迷曲徑
一磬出疏林壁篆苔紋古碑殘歲月深徘徊殊未已好鳥助清吟

瑞雲庵

迢迢一徑繞羊腸與客尋幽到上方
名士登高多感慨老僧

說法半荒唐飛泉噴薄晴疑雨翠竹蕭疏夏亦涼乘興渾忘
閒坐久歸來雲氣滿衣裳

陳耀寰

字朗樞
景甯人

過梧桐邨渡

幾喚梧桐渡口船溪藍山翠兩相鮮此中佳處還須問可有
裴王住輞川

雨浙輞軒續錄卷四十一